

萬 有 文 庫

第一集一千種


王雲五 主編

歐陽永叔集

(二)

歐陽修 著

商務印書館發行



歐陽永叔集

(二)

歐陽修著

國學基本叢書

萬有文庫

第一集一千種

總編纂者

王雲五

商務印書館發行

歐陽文忠公集 居士集

卷四

古詩二十四首

贈無爲軍李道士二首名景仙

無爲道士三尺琴。中有萬古無窮音。音如石上瀉流水。瀉之不竭由源深。彈雖在指聲在意。聽不以耳而以心。心意既得形骸忘。不覺天地白日愁雲陰。

李師琴紋一作形。如臥蛇。一彈使我三咨嗟。五音商羽主肅殺。颯颯坐上風吹沙。忽然黃鍾回暖律。當冬草木皆萌芽。郡齋日午公事退。荒涼樹石相交加。李師一彈鳳凰聲。空山百鳥停嘔啞。我怪李師年七十。面

目明秀光如霞。問胡以然一作試問胡然。笑語我。慎勿辛苦求丹砂。惟當養其根。自然燁其華。一本無上二句又

云。理身如理琴。正聲不可干以邪。我聽其言未云足。野鶴何事還思家。抱琴揖我出門去。獵獵歸袖風中斜。

拜赦一作

拜赦一作。古州南山火明烈。州人共喧喧。兩卯扶白髮。丁寧天語深。曠蕩皇恩闊。乃知天地施。幽遠無

間別欣欣草木意喜氣消殘雪

彈琴效賈島體

古人不可見古人琴可彈彈為一作琴聞古曲聲如與聞一作古人言琴聲雖可聽琴意誰能論橫琴置牀頭當午曝背眠夢見一丈夫嚴嚴古衣冠登牀取之坐一作我琴調作南風絃一奏風雨一作南來再鼓變雲煙鳥獸盡嚶鳴草木亦滋蕃乃知太古時未遠可追還方彼夢中樂心知口難一作難傳既覺失其人起坐涕洟漣

酬學詩僧惟晤

詩三百五篇作者非一人羈臣與棄一作賤妾桑濮乃淫奔其言苟一作或可取滄雜不全純子雖一作之為佛徒未易廢其言其言在合理但懼學不臻子佛一作之與吾儒異轍難同輪一作共論子何獨吾慕自忘夷其身苟能知所歸固有路自新誘進或可至拒之誠不仁維詩於文章泰山一浮塵又如古衣裳組織一作爛成文拾其裁剪餘未識袞服尊嗟子學雖已一作勞徒自苦骸筋一作涉江津一作自遠勤勤袖卷軸一歲三及門一作惟何求一言榮歸以耀一作輝其倫與夫榮其膚不若啓一作習其源韓子亦嘗謂收斂加一作以冠巾

別後奉寄聖俞二十五兄一本作敘別寄聖俞兼酬進道堂夜話見寄之什

長河秋雨多夜插寒潮一作入歲暮孤舟遲客心飛鳥急君老忘卑窮文字或綴緝余生苦難一作拙世險蹈已習離合二十年乖踈多聚集常時飲酒別今別輒飲泣君曰吾老矣不覺兩袖溼我年雖少君白

髮已揖揖。即入反。憶初京北門。送我馬暫立。自茲遭檻穿。一落誰引汲。顛危偶脫死。藏竄甘自墊。一作但令身尚在。果得手重執。聞來喜迎前。貌改驚乍揖。別離纔幾時。舊學廢百十。殘章一作與斷藁。草草各收拾。空窗一作語青燈。夜雨聽蠶蠶。一作明朝解舟南。歸翼縱莫戢。還期明月飲。幸此中秋及。酒酣弄篇章。四坐困供給。歡言正喧譁。別意忽於邑。日暮北亭上。濁醪聊一作共挹。輕一作橈動翩翩。晚水明熠熠。行心一作去雖迫。訣語出猶澀。歸來錄君詩。卷軸多臕臕。誰一作云已老矣。意氣何藥岌。惜哉方壯時。千里足常羸。知之莫予深。力不足呼吸。歎吁偶成篇。聊用綴君什。

紫石屏歌一本作月石硯
屏歌寄蘇子美

月從海底來。行上天東南。正當天中時。下照千丈潭。潭心無風月不動。倒影射入紫石巖。月光水潔石瑩淨。一作感此陰魄來中潛。自從月入此石中。天有兩曜分爲三。清光萬古不磨滅。天地至寶難藏緘。天公呼雷公。夜持巨斧墜巖巖。墮此一片落千仞。皎然寒鏡在玉匳。蝦蟆白兔走天上。空留桂影猶杉杉。一作景山得之一作州刺史。惜不得。贈我意與一作千金兼。自云每到月滿時。石在暗室光出簷。大哉天地間。萬怪難悉談。嗟予不度量。每事思窮探。欲將兩耳目所及。而與造化爭毫纖。煌煌三辰行。日月尤尊嚴。若令下與物爲比。去聲擾擾萬類將誰瞻。不然此石竟何物。有口欲說嗟如鉗。吾奇一作蘇子胸。羅列萬象中包含。不惟胸寬膽亦大。屢出言語驚愚凡。自吾得此石。未見蘇子心懷慚。不經老匠先指決。有手誰敢施鑄鑲。

呼工畫石持寄似。一作此。幸子留意其無謙。

聚星堂前紫薇花

亭亭紫薇花。向我如有意。高煙晚溟濛。清露晨點綴。豈無陽春月。所得時節異。靜女不爭寵。幽姿如自喜。
音將期誰顧。獨伴我憔悴。而我不彊飲。繁英行亦墜。相看兩寂寞。孤詠聊自慰。

獲麟贈姚闕先輩

世已無孔子。獲麟意誰知。我嘗爲之說。聞者未免非。而子獨曰然。有如璫應篋。惟麟不爲瑞。其意乃可推。
春秋二百年。文一作辭。約義甚夷。一從聖人沒。學者自爲師。崢嶸衆家說。平地生嶮巖。相浚益迂怪。各闢出新奇。爾來千餘歲。一作千載餘。舉世不知迷。焯哉聖人經。照耀萬世疑。自從蒙衆說。日月遭蔽虧。常患無氣力。掃除浮雲披。還其自然光。萬物皆見之。子昔已好古。此經手常持。超然出衆見。不爲俗牽卑。近又脫賦一作賦。格飛黃擺銜。羈聖門開大道。夷路肆騰嬉。便可勦衆說。旁通一作異端塞多歧。正途趨一作常簡易。慎勿事嵬嶇。著述須待老。積勤宜少時。苟思垂後世。大禹尙胼胝。顧我今老矣。兩腫一作目蝕昏眇。大誓難久視。心在力已衰。因思少自棄。今縱悔可追。戒我以勉子。臨文但吁嘻。

喜雨

大雨雖霽霈。隔轍分晴陰。小雨散浸淫。爲潤廣且深。浸淫苟不止。利澤何窮已。無言雨大小。一作言雨大小異。小

雨農尤喜宿麥已登實。新禾未抽秧。一作穡及時一日雨。終歲飽豐穰。夜響流震霖。晨暉霽蒼涼。川原淨如洗。草木自生光。童稚喜瓜芋。耕夫望陂塘。誰云田家苦。此樂殊未央。

飛蓋橋翫月

一本題上有六月十四夜

天形積輕清。水德本虛靜。雲收風波止。始見天水性。澄光與粹容。上下相涵映。乃於其兩間。皎皎掛寒鏡。餘暉所照耀。萬物皆鮮瑩。矧夫人之靈。豈不醒視聽。而我於此時。脩一作修然發孤詠。紛昏忻洗滌。俯仰恣涵泳。一本無二句人心曠而閑。月色高愈逾。一作逾惟恐清夜闌。時時瞻斗柄。

竹間亭

啾啾竹間鳥。日夕相嚶鳴。悠悠水中魚。出入藻與萍。水竹魚鳥家。伊誰作斯亭。翁來無車馬。非與彈弋并。潛者入深淵。飛者散縱橫。奈何翁屢來。浪使飛走驚。忘爾榮與利。脫爾冠與纓。還來尋魚鳥。傍此水竹行。鳥語弄蒼翠。魚游翫清澄。而翁乃何爲。獨醉還自醒。三者各自適。要歸亦同情。翁乎知此樂。無厭日來登。

答呂公著見贈

一本作奉答通判太博爲予不飲見贈之作

晉人歌蟋蟀。孔子錄於詩。因知聖賢心。豈不惜良時。行樂不及早。朱顏忽焉衰。馳光如驟虓。一去不可追。今也不彊飲。後雖悔奚爲。三年謫永陽。陷窞不知危。種樹滿幽谷。疏泉瀉清池。新陽染山木。撩亂發枯枝。無人歌青春。自釀白玉卮。今者荷寬宥。一作乞一作得州從爾宜。西湖舊已聞。既見又過之。茵茗間紅綠。鸞

鴛浮渺瀰。四時花與竹。罨俎一作酒。動可隨。況與賢者同。薰然襲一作偉。蘭芝醲。酷寒且醜。清唱婉而遲。一作奇
 四坐各已醉。臨觴獨何疑。昔人逢麴車。流涎尚垂頤。況此盃中趣。久得樂無涯。多憂衰病早。心在良可噫。
一作 譬若臥櫪馬。聞鞞一作 尚鳴悲。春膏已動脈。一作忽 百卉漸葳蕤。丹砂得新方。舊疾庶可治。尚可執
 鞭弭。周旋以忘疲。

送榮陽魏主簿廣一作本

卓犖東一作魏 都子。姓名聞十年。窮冬雪塞空。千里至我門。子足未及闕。我衣驚倒顛。僕童一作童僕 相視疑。寮
 吏或不然。俛首鵠鶴啄。進趨鳧雁聯。青衫靴兩一作兩靴。脚言色情一作情。以温於公門。豈少乃獨得公權。受知
 固不易。知士誠尤難。我思屈童吏。欲辯難以言。觴豆及嘉節。高堂列羣賢。文章看落筆。論議馳後先。破石
 出至寶。決高瀉長川。光暉相磨臙。浩渺肆波瀾。寮吏媿我歎。僕童一作童僕 恪生顏。我顧寮吏嗜。士豈以此觀。
 此聊為戲耳。以驚僕童一作童僕 昏。士欲見其守。視其居賤貧。欲知其所趨。試以義利干。我始識其面。已窺其
 肺肝。禮有來必往。木瓜報琅玕。十年思見之一日。捨我還。何用慰離居。贈子以短篇。

青松贈林子國華一本作贈林國華祕校

青松生而直。繩墨易為功。一作良玉有天質。少加一作磨與礱。子誠懷美材。一作君實有美才。 但未遭良工。養育
 既堅好。英華充厥中。於誰以成之。孟韓荀暨雄。

人日聚星堂燕集探韻得豐字

汗池以其下衆流之所鍾。尺水無長瀾。蛟龍豈其容。顧予誠鄙薄。羣俊枉高蹤。得一不爲少。雖多肯辭豐。譬如登圓境。羅列璧與琮。又若饗鈞天。左右間笙鏞。文章爛照耀。應和相撞舂。而予處其間。眩晃不知從。退之亦嘗云。青蒿倚長松。新陽發羣枯。生意漸豐茸。暮雪浩一作暗。方積醱。醱寒更濃。毋言輕此樂。此樂難屢逢。

橄欖

五行居四時。維火盛南訛。炎焦陵木氣。橄欖得之多。酸苦不相入。初爭久方和。霜苞入中州。萬里來江波。幸登君子席。得與衆果羅。中州衆果佳。珠圓玉光瑳。媿茲微陋質。以遠不見訶。錫飴兒女甜。遺味久則那。良藥不甘口。厥功見沉痾。忠言初厭之事。至悔若何世。已無採詩。詩成爲君哦。

鸚鵡螺

大哉滄海何茫茫。天地百寶皆中藏。牙鬚一作鬚。甲角爭光銜。腥風怪雨灑幽荒。珊瑚玲瓏巧綴裝。珠宮貝闕爛煌煌。泥居殼屋細莫詳。紅螺行沙夜生光。一本作珠宮貝闕。爛煌煌。泥居殼屋。細莫詳。珊瑚。累遭剝腸。匹夫懷璧古所傷。濃沙剝蝕隱文章。一本注胡人謂確砂爲濃沙。出本草。磨以玉粉綠。一作金黃。清罇旨酒列華堂。隴鳥回頭思故鄉。美人清歌蛾眉揚。一鬮凜冽回一作春陽。物雖微遠用則彰。一螺千金價誰量。豈若

泥下追合漿

食糟民

田家種糯官釀酒。權利秋毫升與斗。酒沽得錢糟棄物。一作不棄大屋經年堆欲朽。酒醅濃澗如沸湯。東風來吹酒盞香。壘壘器與瓶。惟恐不得嘗。官沽味醲村酒薄。日飲官酒誠可樂。不見田中種糯人。釜無糜粥度冬春。還來就官買糟食。官吏散糟以為德。嗟彼官吏者。其職稱長民。衣食不蠶耕。所學義與仁。仁當養人義適一作識宜。言可聞達力可施。上不能寬國之利。下不能飽爾一作民之飢。我飲酒爾食糟。爾雖不我責。我責何由逃。

送焦千之秀才

焦生獨立士。勢利不可恐。誰言一身窮。自待九鼎重。有能揭之行。可謂仁者勇。呂侯一作倅相家子。德義勝華寵。焦生得其隨。道合若膠鞏。始生及吾門。徐子喜驚踊。曰此難致寶。一失何由踵。自吾得二生。一作子蔡粲獲雙琪。奈何奪其一。使我意紛靡。吾嘗愛生材。抽擢方鬱鬱。音委勇反猶須老霜雪。然後見森聳。況從主人賢。高行可傾竦。讀書趨簡要。害說去雜冗。新文時我寄。庶可蠲煩瑣。

伏日贈徐焦二生。一本作徐焦二子。伏日遊西湖。余以病不能往。因以贈之。

徐生純明白玉璞。焦子皎潔寒泉冰。清光瑩爾互輝映。當暑自可消炎蒸。平湖綠波漲渺渺。高樹一作樹古

木陰層層。嗟哉我豈不樂此。心雖欲往。身未能。俸優食飽。力不用。官閑日永。一作樂睡莫興。不思高飛慕鴻鵠。反此愁臥。償蚊蠅。三年永陽子所見。山林自放樂可勝。清泉白石對斟酌。巖花野鳥。一作草爲交朋。崎嶇。礪谷窮上下。追逐猿狖爭超騰。一作階酒美賓佳。足自負。飲酣氣橫。猶驕矜。奈何乖離纔幾日。蒼顏非舊白髮增。疆歡徒勞歌且舞。勉飲寧及合與升。行揩眼眇。一作嘔旋看物坐見樓閣先愁登。頭輕目明脚力健。羨子志氣將飄凌。只今心意已如此。終竟事業知將。一作何稱少壯及時宜努力。老大無堪還可憎。

寄生槐

一本題上有答張推官庭槐

檜惟凌雲材。槐實凡木賤。奈何柔脆質。累此孤高幹。龍鱗老蒼蒼。鼠耳光粲粲。因緣初莫原。感吒徒自歎。偷生由附託。得勢爭葱蒨。方其榮盛時。曾莫見真贋。欲知窮悴節。宜試以霜霰。萌芽起微蘖。辨別乖先見。翦除初非難。長養遂成患。雖然根性殊。常恐枝葉亂。惟應植者深。幸不習而變。含容固有害。勦絕須明斷。惟當審斤斧。去惡無傷善。

韓公

一本公作定州 閱古堂

兵閑四十年。士不識金革。水旱數千里。民流誰墾闢。公初來視之。嘻此乃予責。將法多益辦。萬千由十百。整齊。一作容談笑間。進退有寸尺。曰此易爲耳。在吾繩與墨。天成而地出。古所重民食。貯儲非一朝。人命在旦夕。惟茲將奈何。敢不竭吾力。木牛尚可運。玉磬。一作聲猶走糴。因難乃見材。不止將有得。公言初未信。終

歲考成績驕。墮識恩威。謳吟起羸瘠。貔貅著行伍。倉廩飽堆積。文章娛閑暇。一作弄傳記尋一作往昔。英文與武。粲粲圖四壁。酒令列諸將。談鋒摧辯客。周旋顧視間。是不爲無益。循吏一州守。將軍萬夫敵。於公豈止然。事業本夔稷。富壽及黎庶。威名懾夷狄。當歸廟堂上。有位久一作虛席。大匠不揮斧。衆工隨指畫。從容任羣材。文武各以職。

永州萬石亭

寄知永州王願一本上
有寄題注云柳子厚亭

天於生子厚。稟予獨艱哉。超凌驟拔擢。過盛輒傷摧。苦其危慮一作心。常使鳴聲哀。投以空曠地。縱橫放天才。山窮與水險。下上極沿洄。故其於文章。出語多崔嵬。人迹所罕到。遺蹤久荒頽。王君好奇士。後二百年來。翦雜發幽蒼。搜尋得瓊瑰。感物不自貴。因人乃爲材。惟知古可慕。豈免今所哈。我亦奇子厚。開編每徘徊。作詩示同好。爲我銘山隈。

熙寧五年秋七月男發等編定

紹熙二年三月郡人孫謙益校正

答呂公著見贈百卉漸萎蕤。按字書萎。於危切。草木枯貌。旣云春膏已動脈。豈有萎枯之理。當作蕤蕤。蕤蕤草木華垂貌。選詩。文物共蕤蕤。東都賦。望翠華之蕤蕤。今改作蕤。

【贈李道士】

石本作贈宗教
牙石本作芽
惟當石本作燁
石本作曄

【別後寄聖俞】夜插一作牌君老一作去難阨一作艱檻穿一作陷尙在一作幸在

【紫石屏歌】在玉匳一作生

【獲麟】難久視一作雖吁嘻一作噫

【飛蓋橋翫月】風波一作浪

【答呂公著】晉人一作晉

【送魏主簿】我歎一作歎我

【人日聚星堂燕集探韻得豐字】一作豐

【閱古堂】周旋一作摠衣

【萬石亭】於文章一作於

卷五

古詩一十八首

答原父一作答劉廷評

炎歊鬱然蒸。午景熾方飏。子來清風興。蕭蕭吹几簾。又如沃瓊漿。遽飲不知厭。嗟予學苦晚。白首困鉛槧。

危疑奚何一作所質孔孟久已寔羣儒窒自私惟子通且膽幸時丐贏餘屢得飽飢歎嚴嚴一作落落春秋經大

法誰敢覘一本有譬猶天之蒼乃欲學而染兩旬三才失綱紀一作紀綱五代極昏墊盜竊恣肱一作發英雄爭奮劍興亡兩倉

卒事迹多遺欠一作纔能紀成敗豈暇誅姦僭聞見患孤寡一作是非誰證驗嘗欣同好惡遂乞指瑕玷

反蒙華袞褒如譽嫫母豔救非當在早已暴一作暴惡何由斂苟能哀廢痼其可惜針砭風舲或許邀湖綠方

灑灑

蟲鳴

葉落秋水冷衆鳥聲已停陰氣入牆壁百蟲皆夜鳴蟲鳴催歲寒唧唧機杼聲時節忽已換壯心空自驚
平明起照鏡但畏白髮生

奉答子華學士一作韓絳安撫江南見寄之作一本無四字

百姓病已久一言難遽陳良醫將治之必究病所因天下久無事人情貴因循優游以為高一作政寬縱以為仁今日廢其小皆謂不足論明日壞其大又云力難振旁窺各陰拱常職自逡巡歲月浸隳頽紀綱遂紛紜坦坦萬里疆蚩蚩九州民昔而安且富今也迫以貧疾小不加理浸淫將徧身湯劑乃常藥未能去深根鍼艾有奇功暫痛勿吟呻痛定支體胖乃知鍼艾神猛寬相濟理古語六經存蠹弊革僥倖濫官絕貪昏牧羊而去狼未為不仁人俊又沉下位惡去善乃伸賢愚各得職不治未之聞此說乃其要易知行

每艱遲疑與果決利害反掌間捨此欲有爲吾知力徒煩家至與戶到飽飢而衣寒三王所不能豈特今
所一作獨難我昔忝諫列日常趨紫宸聖君堯舜心閔閔極憂勤子華當來時玉音耳嘗親上副明主意
下寬斯人屯江南彼一方巨細到可詢一作論以上恩德當冬反陽春吾言乃其概豈一作非止一方云

送張洞推官赴永興經畧司一本云送張推官掌機宜

自古天下事及時難必成爲謀於未然聰者或莫聽患至而後圖智者有不能未遠前日悔可爲來者銘
熙熙彼西人老死織與耕狂羝一作氏一朝叛烽火四面驚用兵五六年首惡竟逃刑仰賴天子聖乾坤量
包并苗頑不率德舜羽舞於庭謂此雖異類有生亦含情藩籬被觸突譬若豨與羶馴擾以芻豢可呼隨
指令稱藩效臣職冠帶復人形四海得休息瘡痍肉新生敢問前孰失恃安而弛兵酒肴爲善將循默乃
名卿慮患謂生事高談笑難行一方兵遽起愚智共營營上煩天子仁盱食憂吾氓謀議及臺阜幽棲訪
巖扃小利不足爲涓流助滄溟大功難速就倉卒始改更徒自益紛擾何由集功名乃知深遠畫施設在
安平今也實其時鑑前豈非明嚴嚴經略府罇俎集豪英千營飽而嬉萬馬牧在垌相公黃閣老與國爲
長城張子美而秀文章博羣經從軍古云樂知己士所榮感激報恩義當來請長纓

寄聖俞一作因馬察院至云見聖俞於城東輒書長韻奉寄

凌晨有客至自西爲問詩老來何稽京師車馬曜朝日何用擾擾隨輪蹄面顏憔悴暗塵土文字光彩垂

虹霓腔腸時如秋蚓叫。苦調或作寒蟬嘶。語言雖巧身事拙。捷徑恥蹈行非迷。我今俸祿飽餘臍。念子朝夕勤鹽齏。舟行每欲載米送。汴水六月乾無泥。乃知此事尚難必。何況仕路如天一作丹梯。朝廷樂善得賢衆。臺閣俊彥聯簪犀。朝陽鳴鳳爲時出。一枝豈惜容其棲。古來磊落材與知。窮達有命理莫齊。悠悠百年一瞬息。俯仰天地身醜雞。其間得失何足校。况與鳧鷖爭稗穉。憶在洛陽年各一作各少。對花把酒傾玻瓈。二十年間幾人在。在者憂患多乖膠。我今三載病不飲。眼眇不辨騶與驪。壯心銷盡憶閑處。生計易足纔蔬畦。優游琴酒逐漁釣。上下林壑相攀躋。及身彊壯一作壯。健始爲樂。莫待衰病須扶攜。行當買田清潁上。與子相伴把鋤犁。

有馬示徐無黨

吾有千里馬。毛骨何蕭森。疾馳如奔風。白日無留陰。徐驅當大道。步驟中五音。馬雖有四足。遲速在吾心。六轡應吾手。調和如瑟琴。東西與南北。高下山與林。惟意所欲適。九州可周尋。至哉人與馬。兩樂不相侵。伯樂識其外。徒知價千金。王良得其性。此術固已深。良馬須善馭。吾言可爲箴。

天辰

天形如車輪。晝夜常不息。三辰隨出沒。曾不差分刻。一本有其行一何勤。乾健貴於易兩句。北辰居其所。帝座嚴尊極。衆星拱而環。大小一作小各有職。不動以臨之。任德不任力。天辰主下土。萬物由生殖。一動與一靜。同功而異域。

惟王知法此。所以治萬國。

再和聖俞見答

兩畿相望東與西。書來三日猶爲稽。短篇投子譬瓦礫。敢辱報之金裹蹄。文章至寶被埋沒。氣象往往干雲霓。飛黃伯樂不世一作出。四顧驥首空長嘶。嗟哉我豈敢一作能。知子論詩一作經。賴子初指迷。子言古淡有真味。大羹豈須調以蠶。憐我區區欲彊學。跛鼈曾不離汗泥。問子初何得臻此。豈能直到無階梯。如其所得自勤苦。何憚入海求靈犀。周旋二紀陪唱和。凡翼每竝鸞皇棲。有時爭勝不量力。何異弱魯攻彊齊。念子京師苦憔悴。經年陋巷聽朝音潮一作晨。雞兒啼妻嘖一作。午未飯得米寧擇糝與稊。石上紫豪一作。家故有剡藤瑩滑如玻璃。追惟平昔念少壯。零落生死嗟分睽。一揮累紙恣奔放。駿一作。若駕駱仍驂驪。腹雖枵虛氣豪橫。猶勝諂笑病夏畦。名聲不朽豈易得。仕宦得路終當躋。年來無物不可愛。花發有酒誰同攜。問我居留亦何事。方春苦早憂民犁。

感春雜言一本題下有和呂公著

鳩鳴兮屋上。雀噪兮簷間。百鳥感春陽。有如動機關。雄雌相呼和。日兮聒聒不得閑。砌下兩株樹。枯條有誰攀。春風一夜來。花葉何班班。乃知天巧奪人力。能使枯木生紅顏。奈何人爲萬物靈。不及草木與飛翾。自從春來何所覺。但恹睡美不覺白日高南山。行逢百花不着眼。豈念四氣如回環。却思年少億一作前念。

事雖有駟駿難追還。奈何來日尙可樂。曾不勉強相牽扳。淥酒如春波。黃金爲誰慳。人生一世中。一步一笑。百險艱。俟河之清不可得。聊自歌此譏愚頑。

廬山高贈同年劉中允歸南康

廬山高哉幾千仞。根盤幾百里。巖然屹立乎長江。長江西來走其下。是爲揚瀾左里一作。今洪濤巨浪。日夕相舂撞。雲消風止水鏡淨。泊舟登岸而遠望兮。上摩青蒼一作。以瞻竊下。壓后土之鴻厓。試往造乎其間兮。攀緣石磴窺空際。千巖萬壑響松檜。懸崖巨石飛流淙。水聲聒聒亂人耳。六月飛雪灑石砌。仙翁釋子亦往往而逢兮。吾嘗惡其學幻而言咙。但見舟霞翠壁遠近映樓閣。晨鍾暮鼓杳靄羅幡幢。幽花野草不知其名兮。風吹露濕香澗谷。時有白鶴飛來雙。幽尋遠去不可極。便欲絕世遺紛瘡。羨君買田築室老其下。插秧盈疇兮。釀酒盈缸。欲令浮嵐暖翠千萬狀。坐臥常對乎軒窗。君懷磊砢有至寶。世俗不辨珉與玨。策名爲吏二十載。青衫白首困一邦。龍榮聲利不可以苟屈兮。自非青雲白石有深趣。其氣兀硜何由降。丈夫壯節似君少。嗟我欲說安得巨筆如長杠。

送徐生一作徐無黨之澠池

河南地望雄西京。相公好賢天下稱。吹噓死灰生氣餼。談笑陵律回嚴凝。曾陪罇俎被顧盼。羅列臺閣皆名卿。一作徐生南國後來秀。得官古縣依崕陵。脚靴手板實卑賤。賢僑未可吏事繩。攜文百篇赴知己。西

望未到氣已增。我昔初官便伊洛。當時意氣尤驕矜。主人樂士喜文學。幕府最盛多交朋。園林相映花百種。郡邑四顧山千層。朝行綠槐聽流水。夜飲翠幙張紅燈。爾來飄流二十載。鬢髮蕭索垂霜冰。同時竝遊在者幾。舊事欲說無人應。一作文章無用等畫虎。名譽過耳如飛蠅。榮華萬事不入眼。憂患百慮來填膺。羨子年少一作少年。正得路有如扶桑。初日昇。名高場屋已得雋。世有龍門今復登。出門相送親與友。何異籬鷄瞻雲鵬。嗟吾筆硯久已格。感激短章一作章句。因子興。

葛氏鼎一本有歌字

大河昔決東南流。蕭條東郡今遺湫。我從故老問其由。云古五鼎藏高丘。地靈川秀草木稠。鬱鬱佳氣蒸常浮。惟物伏見數有周。祕藏奇恠神所搜。天昏地慘鬼哭幽。至寶欲出風雲愁。蕩搖山川失維陬。九龍大戰驅蛟虬。剗然岸裂轟雲霧。滑人夜驚烏嘲啁。婦走抱兒扶白頭。蒼生仰叫黃屋憂。聚徒百萬如蚍蜉。千金一掃隨浮漚。天旋海沸動九州。此鼎始出人間留。滑人得之不敢收。奇模古質非今俦。器大難用識者不以示世俗。遭擲擲。明堂會朝饗諸侯。饗官百品供王羞。調以五味烹全牛。時有用捨吾無求。二三子學雕琳球。見之始驚中歎愀。披荒斲古爭窮蒐。苦語難出聲啞。馬圖出河龜一作龍。負疇自古恠說何悠悠。嗟吾老矣不能休。勉彊作詩慚効尤。

太白戲聖俞一作讀李白集。效其體。

開元無事一作太平二十年。五兵不用太白閑。太白之精下人間。李白高歌蜀道難。蜀道之難難於上青天。李白落筆生雲煙。千奇萬險不可攀。却視蜀道猶平川。宮娃扶來白已醉。醉裏詩成醒不記。忽然一作乘興登名山。龍咆虎嘯松風寒。山頭婆娑弄明月。九城塵土一作下看塵世。悲人寰。吹笙飲酒紫陽家。紫陽真人駕雲車。空山流水空流花。飄然已去凌青霞。下看一作堪笑區區郊與島。螢飛露濕吟秋草。

邊戶

家世爲邊戶。年年常備胡。兒童習鞍馬。婦女能彎弧。胡塵朝夕起。虜騎蔑如無。邂逅輒相射。殺傷兩常俱。自從澶州盟。南北結歡娛。雖云免戰鬪。兩地供賦租。將吏戒生事。廟堂爲遠圖。身居界河上。不敢界河漁。

梅聖俞寄銀杏

一作和聖俞銀杏
見寄代書之什

鵝毛贈千里。所重以其人。鴨脚雖百箇。得之誠可珍。問子得之誰。詩老遠且貧。霜野摘林實。京師寄時新。封包雖甚微。採掇皆躬親。物賤以人貴。人賢棄而淪。開緘重嗟惜。詩以報慇懃。

與子華原父小飲坐中寄同州江十學士休復

歲晚忽不樂。相過偶乘閑。百年纔幾時。一笑得亦艱。有酒醉嘉客。無錢買嬌鬟。問子官何爲。侍從聯朝班。朝廷多賢材。何用蒯與菅。白髮垂兩鬢。黃金腰九環。奈何章綬榮。飾此木石頑。於國略無補。有慚常在顏。幸蒙二三友。相與文字間。江子獨捨我。一作是高鴻去難攀。秋風動沙苑。郡閣當南山。吟詠日多暇。詔條寬。

可頽寒雲雪一作粉糝幽鳥春縣蠻勝事日向好思君何時還

述懷

歲律忽其周陰風慘遼負孤懷念時節朽質驚衰病憶始來京師街槐綠方映清霜一以零衆木少堅勁
物理固如此人生寧久盛當時不樹立後世猶譏評顧我實孤生飢寒談孔孟壯年猶勇爲刺口論時政
中間蒙選擢官實居諫諍豈知身愈危惟恐職不稱十年困風波九死出檻穽再生君父恩知報犬馬性
歸來見親識握手相弔慶丹心皎雖存白髮生一作已迸慙無羽毛彩來與鸞皇竝鍛翮追羣翔孤唳驚
衆聽嚴嚴玉堂署清禁肅而靜職業愧論思文章慚誥命厚顏難久居歸計無荒逕偷閑就朋友笑語雜
嘲詠歡情雖索寞得酒猶豪橫羣居固可樂龍祿尤難幸何日早收身江湖一漁艇

和劉原父澄心紙一作奉賦

君不見曼卿子美真奇才久已零落埋黃埃子美生窮死愈貴殘章斷藁如瓊瑰曼卿醉題紅粉壁壁粉
已剝昏煙煤河傾岷嶓勢曲折雪壓太華高崔嵬自從二子相繼沒山川氣象皆低摧君家雖有澄心紙
有敢下筆知誰哉宣州詩翁餓一作欲死黃鵠折翼鳴聲哀有時得飽好言語似聽高唱傾金罍二子雖
死此翁在老手尙能工翦裁奈何不寄反示我如棄正論求俳談嗟我今衰不復昔空能把卷闔且開百
年干戈流戰血一國歌舞今荒臺當時百物盡精好往往遺弃淪蒿萊君從何處得此紙純堅瑩膩卷百

枚官曹職事喜一作樂 闕暇臺閣唱和相追陪文章自古世不乏間出安知無後來

熙寧七年秋七月男發等編定

紹熙二年三月郡人孫謙益校正

【答原父】蕭蕭一作蕭蕭膏欣一作常欣

【答子華】濫官一作庸下寬一作衣

【寄聖俞】俸祿一作祿俸

【送徐生】幕府一作下

【葛氏鼎】轟雲一作雲雷

【太白戲聖俞】龍咆石本作咆九域石本作擾擾空山石本作山中下看石本作視

【澄心紙】空能一作徒能

卷六

古詩二十五首

奉使契丹道中答劉原父桑乾河見寄之作

憶昨初受命。同下紫宸朝。問君當何之。笑指北斗杓。共念到幾時。春風約回鑣。所持既異事。前後忽相遼。歲月坐易若。一作失。山川行知遙。回頭三千里。雙闕在紫霄。我老倦鞍馬。安能事吟嘲。君才綽有餘。新句益一作亦。飄飄前日逢。呂郭解鞍憩山腰。僮僕相問喜。馬鳴亦蕭蕭。出君桑乾詩。寄我慰寂寥。又喜前見君。相期駐征軺。雖知不久留。一笑樂亦聊。歸路踐冰雪。還家脫狐貂。君行我卽至。春酒待相邀。

書素屏

我行三千里。何物與我親。念此尺素屏。曾不離我身。曠野多黃沙。當午白日昏。風力若牛弩。飛砂還射人。暮投山椒館。休此車馬勤。甌屏置牀頭。輾轉夜向晨。臥聽穹廬外。北風驅雪雲。勿愁明日雪。且擁狐貂溫。君命固有嚴。羈旅誠苦辛。但苟一夕安。其餘非所云。

馬齧雪

馬飢齧雪渴飲冰。一作行路冰。北風卷地來。一作寒。崢嶸馬悲躑躅人不行。日暮塗遠千山橫。我謂行人止歎聲。馬常勉力無悲鳴。白溝南望如掌平。十里五里長。一作亭。短亭臘雪銷。盡春風輕。火燒原頭青草生。遠客還家紅袖迎。樂哉人馬歸有程。男兒雖有四方志。無事何須煩。一作勤遠征。

風吹沙一本題上
有北字

北風吹沙千里黃。馬行确塋悲摧藏。一作當。冬萬物慘顏無。一作色。冰雪射日生。一作光芒。一年百日風塵

道安得朱顏長美好攬鞍鞭一作起馬行勿遲酒熟花開二月時

重贈劉原父一作憶昨呈劉原文

憶昨君當使北時我往別君飲君家愛君小鬟初買得如手未觸新開花醉中上馬不知夜但見九陌燈
火人誼譁歸來不記與君別酒醒起坐空咨嗟自言我亦隨往矣行即逢君何恨邪豈知前後不相及歲
一作月忽忽行無涯古北嶺口踏新雪馬孟山西看落霞風雲一作暮慘失道路礪谷夜靜聞響屨行迷
方嚮但看日度盡山險方逾行一作沙客心漸遠誠易感見君雖晚喜莫加我後君歸一作十日君先躍
馬未足誇新年花發見回雁歸路柳暗藏嬌鴉而今一作來春物已爛漫念昔草木未芽人生每苦勞事
役老去尙能憐物華從今有暇即相過安得載酒長盈車

贈沈遵一作贈沈博

一本序云予昔於滁州作醉翁亭於琅琊山有記刻石往往傳人間太常博士沈遵好奇之士也聞
一往遊焉愛其山水歸而以琴寫之作醉翁吟一調惜不以傳人者五六年矣去年冬予奉使契丹
沈君會予恩冀之間夜闌酒半出琴而作之予
既嘉君之好尙又愛其琴聲乃作歌以贈之

羣動夜息浮雲陰沈夫子彈醉翁吟醉翁吟以我名我初聞之喜且驚宮聲三疊何泠泠酒行暫止四坐
傾一本有爲君屏百慮各以兩耳聽兩句有如風輕日煖好鳥語夜靜山響春泉鳴坐思千巖萬壑醉眠處寫君三尺膝上
橫沈夫子恨君不爲醉翁客不見翁醉一作醉翁山間亭翁歡不待絲與竹把酒終日聽泉聲有時醉倒枕谿

石青山白雲爲枕屏。花間百鳥喚不覺。日落山風吹自醒。一本有沈夫子君過滁陽今幾時。滁人皆喜醉翁醉。至今人人能道之。長記山間逢太守。籃輿歸六旬。我時四十猶彊力。自號醉翁聊戲客。爾來憂患十年間。一本客字下作爾來纔十年。遇酒飲不得軒裳外飾。誠可榮。鬢髮未老嗟先白。滌人思我雖未忘。見我今應不能識。沈夫子愛君一罇復一琴。萬事不可干其心。自非曾是醉翁客。莫向俗耳求知音。一本末兩句作高懷所得貴自適。俗耳何用求。知音可笑。人生不飲酒。惟知白首戀黃金。

答聖俞一本題下高車見過

人皆喜詩翁。有酒誰肯一醉之。嗟我獨無酒。數往從一作就翁何所爲。翁居南方我北走。世路離合安可期。汴渠千艘日上下。來及水門猶未知。五年不見勞夢寐。三日始往何其遲。城東賺河有名字。萬家寒水爲汴池。人居其上苟賢者。我視此水猶漣漪。入門下馬解衣帶。共坐習習清風吹。溼薪煖熒煮薄茗。四顧壁立空無遺。萬錢方丈飽則止。一瓢飲水樂可一作何涯。况出新詩數十首。珠璣大小光陸離。他人欲一不可得。一作君家筐篋滿莫持。才大一作多名高乃富貴。豈比金紫包愚癡。貴賤同爲一丘土。聖賢獨一作長如星日垂。道德內樂不假物。猶一作所須朋友并良時。蟬聲漸已變秋意。得酒安問醇與醜。玉堂官閑無事業。親舊幸可從其私。與翁老矣會有幾。當棄百事勤追隨。

感興五首齋於醴泉宮作

奉祠嚴祕館。攝事罄精誠。歲晏悲木落。天寒聞鶴鳴。念昔丘壑趣。豈知朝市情。弱齡嬰仕宦。壯節慕功名。

多病慚厚祿。早衰歎餘生。未知犬馬報。安得遂歸耕。

懷祿不知慚。人雖不吾責。貧交重意氣。握手猶感激。煌煌腰間金。兩鬢颯已白。有生天地間。壽考非金石。

古人報一飯。君子不苟得。憂來自悲歌。涕淚下沾臆。

清夜雖云長。白日亦易晚。循環百刻中。勢若九走坂。盈虧自相補。得失何足算。餐霞可延年。飲酒誠自損。

未知辛苦長。孰若適意短。二者一何偷。百年皆不免。顏回不著述。後世存愈遠。聖賢非虛名。惟善爲可勉。

仕宦希寸祿。庶無飢寒迫。讀書事一作爲文章。本以代耕織。學成頗自喜。祿厚愈多責。挾山以超海。事有非

其力。君子貴量能。無輕食人食。

唧唧復唧唧。夜歎曉未息。蟲聲急愈尖。病耳聞若刺。壯士易爲老。良時難再得。日月相隨東。天行自西北。

三者不相謀。萬古無窮極。安知人間世。歲月忽已易。

吳學士石屏歌一作和張生鷓樹屏一無和字

晨光入林衆鳥驚。臑膊飛鴉亂鳴。穿林四散投空去。黃口巢中飢待哺。雌者下啄雄高盤。雄雌相呼飛

復還。空林無人鳥聲樂。古木參天枝屈蟠。下有怪石橫樹一作其間。煙埋草沒苔蘚斑。借問此景誰圖寫。乃

是吳家石屏者。號工剜山取山骨。朝鑿暮斲非一日。萬象皆從石中出。吾嗟人愚不見天地造化一作造物之

初難。乃云萬物生自然。豈知鑄鑄刻畫醜與妍。千狀萬態不可殫。神愁鬼泣晝一作日夜不得閑。不然安得

巧工妙手，儘精竭思，不可到若無若有。縹緲生雲煙，鬼神功成天地惜。藏在號山深處石，惟人有心無不獲。一作乃知人天地雖神，一作公藏不得。又疑鬼神好勝憎吾儕，欲極奇怪窮吾才。一作傳張生自西來，吳家學士見且吟。醉點紫毫淋墨煤，君才自與鬼神鬪。嗟我老矣安能陪。

初食車螯一本題上云京師

纍纍盤中蛤，來自海之涯。坐客初未識，食之先歎嗟。五代昔乖隔，九州如割瓜。東南限淮海，邈不通夷華。於一作子時北州人飲食陋，莫加雞豚爲異味。貴賤無等差，自從聖人出。天下爲一家，南產錯交廣。西珍富邛巴，水載每連舳。陸輸動盈車，谿潛細毛髮。海怪雄鬚牙，豈惟貴公侯。閭巷飽魚鰕，此蛤今始至。其來何晚邪，螯蛾聞二名。車螯一名車蛾久見南人誇，璀璨殼如玉。斑斕點生花，含漿不肯吐。得火遽已呀，共食惟恐後。爭先屢成譁，但喜美無厭。豈思來甚遐，多慙海上翁。辛苦斲泥沙。

送裴如晦之吳江一本無下三字注云席上分得已字

雞鳴車馬馳，夜半聲未已。皇皇走聲利，與日爭寸晷。而我獨何爲，閑宴奉君子。京師十二門，四方來萬里。願吾坐中人，暫聚浮雲爾。念子一扁舟，片帆如鳥起。文章富千箱，吏祿求斗米。白玉有時沽，青衫豈須恥。人生足憂患，合散乃常理。惟應當歡時，飲酒如飲水。

盤車岡一本上題和聖俞下注呈楊直講

歐陽文忠公集 二 古詩

二十五

淺山嶙嶙亂石轟轟。山石礮聲車碌碌。山勢盤斜隨澗谷。側轍傾轅如欲覆。出乎兩崖之隘口。忽見百里之平陸。坡長坂峻牛力疲。天寒日暮人心速。楊襄一作生忍飢官太學。得錢買此纔盈幅。愛其樹老石硬。山回路轉。高下曲直。橫斜隱見。妍媸嚮背各有態。遠近分毫皆可辨。自言昔一作古有數家筆。畫古一作久傳多名姓失。後來見者知謂誰。乞詩梅老聊稱述。古畫畫意不畫形。梅詩詠物無隱情。忘形得意知者寡。不若見詩如見畫。乃知楊生真好奇。此畫此詩兼有之。樂能自足乃一作即爲富。豈必金玉名高貴。朝看畫暮讀詩。楊生得此可不飢。

答梅

一作和無梅字

聖俞莫登樓

在禮部貢院鎖試進士上元夜作

莫登樓。樂哉都人方競遊。樓闕夜氣春煙浮。玉輪東來從海陬。纖靄洗盡當空留。燈光月色爛不收。火龍啣山祝千秋。緣竿踏索雜幻優。鼓喧管咽耳欲啾。清風嫋嫋夜悠悠。瑩蹄文一作輪蹄文角車如流。姪姪扶欄車兩頭。髮髻垂鬢嬌未羞。念昔年少追朋儔。輕衫駿馬今則不。中年病多昏兩眸。夜視曾不如鴝鷓。足雖欲往意已休。惟思睡眠擁衾稠。人心利害兩不謀。春陽稍愆天子憂。安得四野陰雲油。甘澤以時豐麥麩。遊騎踏泥非我愁。

答聖俞莫飲酒

此已下皆貢院中作

子謂莫飲酒。我謂莫作詩。花開木落蟲鳥悲。四時百物亂我思。朝吟搖頭暮蹙眉。雕肝琢腎聞退之。此翁

此語還自違。豈如飲酒無所知。自古不飲無不死。惟有爲善不可遲。一作功施當世聖賢事。不然文章千載垂。其餘酪酊一罇酒。萬事崢嶸皆可齊。腐腸精肉兩家說。計較屑屑何其卑。死生壽夭無足道。百年長短纔幾時。但飲酒莫作詩。子其聽我言非癡。

思白兔雜言戲答公儀憶鶴之作

君家白鶴白雪毛。我家白兔白玉毫。誰將贈兩翁。謂此二物皎潔勝瓊瑤。已憐野性易馴擾。復愛仙格何孤高。玉兔四蹄不解舞。不如雙鶴能清俦。低垂兩翅趁節拍。一作拍節婆娑弄影誇嬌饒。兩翁念此二物者。久不見之心甚勞。京師少年殊好尙。意氣橫出爭雄豪。清罇美酒不輒飲。千金爭買紅顏韶。莫令少年聞我語。笑我乖僻遭譏嘲。或被偷開兩家籠。縱此二物令逍遙。兔奔滄海卻入明月窟。鶴飛玉山千仞直上青松巢。索然兩衰翁。何以慰無繆。纖腰綠鬢既非老者事。玉山滄海一去何由招。

戲答聖俞

鶴行而啄。青玉觜。枯松脚。兔蹲而纍。尖兩耳。攢四蹄。往往於人家高堂淨屋。一作室會見之。錦裝玉軸掛壁垂。乍見拭目猶驚疑。羽毛襍。襍眼晴活。若動不動如風吹。主人矜誇百金買。云此絕筆人間奇。畫師畫生不畫死。所得百分三二爾。豈如翫物翫其真。凡物可愛惟精神。況此二物物之珍。月光臨靜夜。雪色凌清晨。二物於此時。瑩無一點纖埃塵。不惟可醒醉翁醉。能使詩老詩思添清新。醉翁謂詩老子勿謂我愚老。

弄兔兒憐鶴雛。與子俱老其衰乎。奈何反捨我。欲向一作東家看舞姝。須防舞姝見客笑。白髮蒼顏君自照。

和梅龍圖公儀謝鵬

有詩鶴勿喜。無詩鵬勿悲。人禽固異性。所趣各有宜。朝戲青竹林。暮棲高樹枝。喞喞山鹿鳴。格磔野鳥啼。聲音不相通。各以類自隨。使鶴居籠中。垂頭以一作聽詩。鸚鵡享鍾鼓。魚鳥見西施。鵬鶴不宜爭。所爭良可知。蚍蜉與蟻子。爲物固已微。當彼兩交鬪。勇如聞鼓聲。有心皆好勝。未免爭是非。於我一何薄。於彼一何私。欄檻啄花卉。叫號驚睡兒。跳踉兩腳長。落泊雙翅垂。何足充翫好。於何定妍媸。鵬口不能言。夜夢以告之。主人起謝鵬。從我今幾時。僮奴謹守護。出入煩提攜。逍遙遂棲息。飲啄安雄雌。花底弄日影。風前理毛衣。豈非主人恩。報效爾宜思。主人今白髮。把酒無翠眉。養鶴鵬又妬。我言堪解頤。

和聖俞感李花

昨日摘花初見桃。今日摘花還見李。晴風暖日苦相催。春物所餘知有幾。中年多病壯心衰。對酒思歸未得歸。不及牆根花與草。春來隨處自芳菲。

折刑部海棠戲贈聖俞二首

搖搖牆頭花。笑笑弄顏色。荒涼衆草間。露此紅的皪。草木本無情。及時如自得。青春不可恃。白日忽已昃。

纒之重吟哦。歸坐成歎息。人生浪自苦。得酒且開釋。不見宛陵翁。作詩頭早白。

搖搖牆頭花。豔豔爭青娥。朝見開尚少。暮看繁已多。不惜花開繁。所惜時節過。昨日枝上紅。今日隨流波。物理固如此。去一作古來知奈何。達人但飲酒。壯士徒悲歌。

刑部看竹效孟郊體

花妍兒女姿。零落一何速。竹色君子德。猗猗寒更綠。京師多名園。車馬紛馳逐。春風紅紫時。見此蒼翠玉。凌亂迸青苔。蕭疎拂華屋。森森日影閑。濯濯生意足。幸此接清賞。寧辭薦芳醪。黃昏人去一作黃昏寂寂。鎖空廊。枝上月明春一作看鳥宿。

熙寧五年秋七月男發等編定

紹熙二年三月郡人孫謙益校正

【答聖俞】則止一作即止

【石屏歌】斲一作琢雄雌一作雌雄

【食車螯】但喜一作知

【莫飲酒】雕肝琢腎一作雕琢肝腎

【思白兔】白鶴白雪毛石本作雙。嬌饒一作妖饒爭買石本作鬪買。

【感李花】摘花還見李花一作桃

卷七

古詩二十二首

贈沈博士歌遵一作醉翁吟

沈夫子。胡爲醉翁吟。醉翁豈能知爾琴。滁山高絕滁水深。空巖悲風夜吹林。山一作泉溜白玉懸青岑。一瀉萬仞源莫尋。醉翁每來喜登臨。醉倒石上遺其簪。雲荒石老歲月侵。子有三尺徽一作暉。黃金寫我幽思窮。崎嶇自言愛此萬仞水。謂是太古之遺音。泉淙石亂到不平。指下嗚咽悲人心。時時弄餘聲。言語軟滑如春禽。嗟乎沈夫子。爾琴誠工彈且止。我昔被謫居滁山。名雖一作雖爲翁實少年。坐中醉客誰最賢。杜彬琵琶皮作絃。自從彬死世莫傳。玉練鎖東坡詩云新客從翻玉連鎖練疑當作連聲入黃泉。死生聚散日零落。耳冷心衰翁索莫。國恩未報慚祿厚。世事多虞嗟力薄。顏摧鬢改眞一翁。心一作已憂醉安知樂。沈夫子謂我翁言何苦悲。人生百年間。飲酒能幾時。攬衣推琴起視夜。仰見河漢西南移。

和聖俞李侯家鴨脚子

鴨脚生江南。名實未相浮。絳囊因入貢。銀杏貴中州。致遠有餘力。好奇自賢侯。因令江上根。結實夷門秋。

始摘纔三四。金奩獻凝旒。公卿不及識。天子百金酬。歲久子漸多。壘壘枝上稠。主人名好客。贈我比珠投。博望昔所徙。蒲萄安石榴。想其初來時。厥價與此侔。今也徧中國。籬根及牆頭。物性久雖在。人情逐時流。惟當記其始。後世知來由。是亦史官法。豈徒續君謳。京師無鴨脚樹。駙馬都尉李和文自南方移植于其第。

送吳生南歸一作送吳孝宗字子京

自我得曾子。於茲二十年。今又得吳生。既得喜且歎。古士不並出。百年猶比肩。區區彼江西。其產多材賢。吳生初自疑。所擬豈其倫。我始見曾子。文章初亦然。崑崙傾黃河。渺漫盈百川。決疏以道一作導之。漸斂收橫瀾。東溟知所歸。識路到不難。吳生始見我。袖藏新文篇。一作編忽從布褐中。百寶寫一作瀉我前。明珠雜瓊貝。磊砢或不圓。問生久懷此。奈何初無聞。吳生不自隱。欲吐羞俛顏。少也不自重。不爲鄉人憐。中雖知自悔。學問苦賤貧。自謂久而信。力行困彌堅。今來決疑惑。幸冀蒙洗滌。我笑謂吳生。爾其聽我言。世所謂君子。何異於衆人。衆人爲不善。積微成滅身。君子能自知。改過不遑巡。惟於斯二者。愚智遂以分。顏回不貳過。後世稱其仁。孔子過而更。日月披浮雲。子路初來時。雞冠佩猊豚。斬蛟射白額。後卒爲名臣。子旣悔其往。人誰禦其新。醜夫祀上帝。孟子豈不云。臨行贈此言。庶可以書紳。

樂哉襄陽人送劉太尉從廣一作景元赴襄陽一本無下三字。景元蓋字。

嗟爾樂哉襄陽人。萬屋連薨清漢濱。語言輕清微帶秦。南通交廣西峨岷。羅縠織麗藥物珍。枇杷柑橘薦

清罇磊落金盤爛。璘璘榭頭縮項昔所聞。黃橙擣一作橙齏香復辛。春雷動地竹走根。錦苞玉筍味爭新。

鳳林花發南山春。掩映谷口藏山門。樓臺金碧瓦鱗鱗。峴首高亭倚浮雲。漢水如天瀉沔沔。斜陽返照白

鳥羣。兩岸桑柘雜耕耘。文王遺化已寂寞。千載誰復思其仁。荊州漢魏以來重。古今相望多名臣。嗟爾樂

哉襄陽人。道扶白髮抱幼孫。遠迎劉侯朱一作朱輪。劉侯年少氣甚淳。詩書學問若寒士。罇俎談笑多嘉

賓。往時邢洛一作襄有善政。至今遺愛留其民。誰能持我詩以往。爲我先賀襄陽人。

奉酬揚州劉舍人見寄之作原父一作酬

別君今幾時。歲月如插羽。悠悠寢與食。忽忽朝復暮。紛紛竟何爲。凜凜還自懼。朝廷無獻納。倉廩徒耗蠹。

風霜苦見侵。衰病日增故。江湖豈不思。懇悃布已屢。美哉廣陵公。風政傳道路。優游侍從臣。左右天子顧。

君來一何遲。我請亦有素。何當兩還分。尙冀一相遇。把手或未能。尺書幸時寓。

西齋手植菊花過節始開。偶書奉呈聖俞

秋風吹浮雲。寒雨灑清曉。鮮鮮牆下菊。顏色一何好。好色豈能常。得時仍不早。文章損精神。何用覲天巧。

四時悲代謝。萬物惜凋槁。豈知寒鑑中。兩鬢甚秋草。東城彼詩翁。學問同少一作年。小風塵世事多。日月良

會少。我有一罇酒。念君思共倒。上浮黃金蕊。送以清歌臯。爲君發朱顏。可以卻君老。

於劉功曹家見楊直講襄女奴彈琵琶戲作呈聖俞

大絃擊遲小絃促。十歲嬌兒彈啄木。啄木不啄新生枝。惟啄槎牙一作牙槎枯樹腹。花繁蔽日鎖空園。樹老參天杳深谷。不見啄木鳥。但聞啄木聲。春風和暖百鳥語。山路礧礧行人行。啄木飛從何處來。花間葉底時丁丁。林空山靜啄愈響。行人舉頭飛鳥驚。嬌兒身小指撥硬。功曹廳冷絃索鳴。繁聲急節傾四坐。爲爾飲盡黃金觥。楊君好雅心不俗。太學官卑飯脫粟。嬌兒兩幅青布裙。三脚木牀坐調曲。奇書古畫不論價。盛以錦囊裝玉軸。披圖掩卷有時倦。臥聽琵琶仰看屋。客來呼兒旋梳洗。滿額花鈿貼黃菊。雖然可愛眉目秀。無奈長飢頭頸縮。宛陵詩翁勿謂渠。人生自足乃爲娛。此兒此曲翁家無。

長句送陸子履學士通判宿州

一本作
宿州非

古人相馬不相皮。瘦馬雖瘦骨法奇。世無伯樂良可嗤。千金市馬惟市一作其肥。騏驥伏櫪兩耳垂。夜聞秋風仰秣嘶。一朝絡以黃金羈。且刷一作發吳越暮燕睡。丈夫可憐憔悴時。世俗庸庸皆見遺。子履自少聲名馳。落筆文章天下知。開懷吐胸不自疑。世路迫窄多穿機。鬢毛零落風霜摧。十年江湖千首詩。歸來京國舊遊非。大笑相逢索酒卮。酒酣猶能弄蛾眉。山川搖落百草腓。愛君不改青松枝。念君明當整驂駢。贈以瑤華期早歸。豈惟朋友相追隨。坐使臺閣生光輝。

送公期得假歸絳

風吹積雪銷太行。水暖河橋楊柳芳。少年初仕卽京國。故里幾歸成鬢霜。山行馬瘦春泥滑。野飯天寒餒

粥香留連芳一作風。物佳節過東帶還來朝未央。

送宋次道學士赴一作知太平州一作求。

古堤老柳藏一作楊柳。春煙桃花水下清明前。江南太守見之笑。擊鼓插旗催解船。一作打鼓插旗催發船。侍中令傳

宜有後學士清才方少年。文章秀粹得家法。筆畫點綴多餘一作逾。妍藏書萬卷復強記。故事累朝能口傳。

來居侍從乃其職。遠置州郡誰謂本多。然交游一時盡英一作豪。俊車馬兩岸來聯翩。船頭朝轉暮千里。有

酒胡不為一作為不留連。

謝觀文王尚書惠西京牡丹舉正。

京師輕薄兒。意氣多豪俠。爭誇朱顏事年少。肯慰白髮將花插。尚書好事與俗殊。憐我霜毛苦蕭颯。贈以

一作寄贈洛陽花滿盤。鬪麗爭奇紅紫雜。兩京相去五百里。幾日馳來足何捷。紫檀金粉香未吐。綠萼紅苞露

猶浥。謂我嘗為洛陽客。頗向此花曾涉獵。憶昔進士初登科。始事相公沿吏牒。河南官屬盡賢俊。洛城池

一作苑。禦相連接我時年。纔二十餘。每到花開如蛺蝶。姚黃魏紅腰帶鞵。潑墨齊頭藏綠葉。鶴翎添色又其

次。此外雖妍猶婢妾。爾來不覺三十年。歲月纔如熟羊胛。無情草木不改色。多難人生自摧拉。見花了了

雖舊識。感物依依幾投睫。念昔逢花必沽酒。起坐驩呼屢傾榼。而今得酒復何為。愛花繞之空百匝。心衰

力懶難勉強。與昔一何殊。勇怯感公意厚不知報。墨筆淋漓口徒囁。

送朱職方提舉運鹽一本云表臣

齊人謹一作建鹽筴伯者之事爾計口收其餘登耗以生齒民充國亦富粲若有條理惟一作非三王法儒

者猶爲耻後世益不然權奪由漢始權量自持操屑屑已甚矣穴竈如蜂房熬波銷海水豈知戴白民食

淡有至死物艱利愈厚令出姦隨起良民陷盜賊峻法難禁止問官得幾何月課煩笞箠公私兩皆然巧

拙可知已英英職方郎文行粹而美連年宿與泗有政皆可紀忽來從辟書感激赴知己閱然哀遠人吐

策獻天子治國如治身四民猶四體奈何窒其一無異欽厥趾工作而商行一作與商賈本末相表裏臣請通

其流爲國掃泥滓金錢歸府藏滋味飽閭里利害難先言歲月可較比鹽官皆謂然丞相曰可喜適時乃

爲才高論徒譎詭夷吾苟今一作復出未以彼易此隋隄樹旣旣汴水流瀾瀾子行其勉旃吾黨方傾耳

嘗新茶呈聖俞

建安三千里京師三月嘗新茶人情好先務取勝百物貴早相矜誇年窮臘盡春欲動蟄雷未起驅龍一作龍未起

驅蟲她夜聞擊鼓滿山谷千人助叫聲喊呀萬木寒癡睡不醒惟有此樹先萌芽乃知此爲最靈物宜

一作疑其獨得天地之英華終朝採摘不盈掬通犀銙小圓復窻鄙哉穀雨槍與旗多不足貴如刈麻建安

太守急寄我香蕝包裹封題斜泉甘器潔天色好坐中揀擇客亦嘉一作佳新香嫩色如始造不似來遠從

天涯停匙側盡試水路拭目向空看乳花可憐俗夫把金錠一作挺茶錄多用挺字爲古按一作挺猛

火炙背如蝦蟇。由來真物有真賞。坐逢詩老頻咨嗟。須臾共起索酒飲。何異奏雅終淫哇。

次韻再作一本云
茶歌

吾年向老世味薄。所好未衰惟飲茶。建谿苦遠雖不到。自少嘗見閩人誇。每嗤江浙凡茗草。叢生狼藉惟藏蛇。今江浙茶園俗言多蛇。豈如含膏入香作金餅。蜿蜒兩龍戲以呀。其餘品第亦奇絕。小愈精皆露芽。泛之白花如粉乳。乍見紫面生光華。手持心愛不欲碾。有類弄印變成窠。論功可以療百疾。輕身久服勝一作如。胡麻。我謂斯言頗過矣。其實最能祛睡邪。茶官貢餘偶分寄。地遠物新來意嘉。親烹屢酌不知厭。自謂此樂真一作誠。無涯。未言久食成手顫。已覺疾飢一作病。生眼花。客遭水厄疲捧椀。口吻無異蝕月蟄。僮奴傍視疑復笑。嗜好乖僻誠堪嗟。更蒙酬句怪可駭。兒曹助噪聲哇哇。

樂郊詩爲劉原甫作一本注
原父鄆州東園也

樂郊何所樂。所樂從公遊。三日公不出。其民蹙然愁。一聞車馬音。從者如雲浮。吾問鄆之人。無乃失業不云。惟安其業。然後樂其休。樂郊何所有。胡不考公詩。有山在其東。有水出遼夷。有臺以臨望。有沼以游嬉。俯仰迷上下。朱欄映清池。草木非一種。青紅隨四時。其餘雖瑣屑。處置各有宜。樂郊何以名。吾爲本其意。自古賢哲人。所存非一世。當時偶然迹。來者因不廢。鄆非公久留。公去民孰賴。此亭公所登。此樹公所憩。俾民百年思。豈取一日醉。

洗兒歌爲聖俞作一本云前日送酒遂助洗兒輒成短歌更資一笑呈聖俞

月暈五色如虹蜺深山猛虎夜生兒虎兒可愛一作光陸離開眼已有百步威詩翁雖老神骨秀想見嬌

嬰目與眉木星之精爲紫氣照山生水水生犀兒一作翁不比他兒翁三十年名天下知材高位下衆所

惜天與此兒聊慰之翁家洗兒衆人喜不一作莫惜金錢散閭一作鄰宛陵他日見高門車馬煌煌梅氏子

鳴鳩崇政殿後考試所作

天將陰鳴鳩逐婦鳴中林鳩婦怒啼無好音天雨止鳩呼婦歸鳴且喜婦不亟歸一作還呼不已逐之其去

恨不早呼不肯來固其理吾老病骨知陰晴每愁天陰聞此聲日長思睡不可得遭爾聒聒何時停衆鳥

笑鳴鳩陽拙固無匹不能娶巧婦以共營家室寄巢生子四散飛一身有婦長相失夫婦之恩重太山背

恩棄義須臾間心非無情不得已物有至拙誠可憐君不見人心百態巧且艱臨危利害兩相關朝爲親

戚暮仇敵自古常嗟交道難

代鳩婦言一本注聞士有欲奔妻者作

斑然錦翼花簇簇雄雌相隨樂不足抱雛出卵翅羽成豈料一朝還反目人言嫁雞逐雞飛安知嫁鳩被

鳩逐古來有盛必有衰富貴莫忘貧賤時女乘父母嫁一作婦曰歸中道捨君何所之天生萬物各有類誰

謂鳥獸爲無知雖無仁義有情愛苟聞此言寧不悲

看花呈一本有韓子華內翰崇政殿後考試作

老雖可憎還可嗟，病眼眇昏愁看花。不知花開桃與李，但見紅白何交加。春深雨露新洗濯，日暖金碧相輝華。浮香著物收不得，含意欲吐情無涯。可愛疎籬靜相對，最宜落日初西斜。時傾賜壺共斟酌，及此蜂鳥方誼譁。凡花易見不足數，禁籞難到堪歸誇。老病對此不知厭，年少何用苦思家。

啼鳥崇政殿後考試舉人卷子作

提葫蘆，提葫蘆，不用沽美酒。宮一作官壺日賜新撥醅，老病足以扶衰朽。百舌子，百舌子，莫道泥滑滑。宮花

正好愁雨來，暖日方催花亂發。苑樹千重綠暗春，珍禽綵羽自成羣。花間祇慣迎黃屋，鳥語初驚見外人。千聲百轉忽飛去，一作來枝上自落紅紛紛。晝簾陰陰隔宮燭，禁漏杳杳深千門。可憐枕上五更聽，不似潞州山裏聞。

和聖俞一本二字一作人唐書局後叢莽中得芸香一本之作用其韻

有芸黃其華，在彼衆草中。清香濯曉露，秀色搖春風。幸依華堂陰，一顧曾不蒙。大雅彼君子，偶來從學宮。文章高一世，議論一作伏羣公。多識由博學，新篇匪雕蟲。唱酬爛衆作，光輝發幽叢。在物苟有用，得時寧久窮。可嗟凡草木，糞壤自青紅。

答劉原父舍人見過後中夜酒定復追昨日所覽雜記并簡梅聖俞之作

君子忽我願願一作我。貧家復何有。虛堂來清風。佳果薦濁酒。簡編記遺逸。論議相可否。欲知所書人。其骨多已朽。前者既已然。後來寧得久。所以昔人云。杯行莫停手。

熙寧五年秋七月男發等編定

紹熙二年三月郡人孫謙益校正

朝佐謂樂郊詩有水出透夷夷平也。傷也。與透字不類。按說文透迤斜去貌。集韻委曲自得貌。詩作委蛇。漢書作透蛇。恐合作透迤。而蜀本建本羅氏本誤作透夷。

永嘉錢文子謂詩羔羊篇有委蛇字。離騷載雲旗之委蛇。一本作透迤。一本作委移。劉向九歎遵江曲之透移。蓋變委作透。變蛇作迤。移二字矣。張衡西京賦女娥坐而長歌。聲清暢而蜺蛇。又以委爲蜺。孫綽天台山賦既克濟於九折。路威夷而脩通。潘安仁金谷集詩迴谿縈曲阻。峻阪路威夷。又盡變作威夷字。皆委曲貌。今作透夷。乃參古今之變。必有所據。其實則平夷也。

右透夷二字。初不必辯。著此以爲輕改字畫之戒。

【送吳生】我前一作在前顏回一作顏子雞冠一作冠雞祀上帝祀一作作事

【楊直講女奴彈琵琶】行人舉頭飛鳥驚一作飛鳥啼盛以錦囊一作古錦裁囊一作古

【送公期歸絳】還來一作歸來

【謝王尚書牡丹】事年少事一作競復何為復一作亦力懶力一作乏

【嘗新茶】三月二月一作此為一作草木向空一作向籬

【次韻再作】豈如一作豈知亦奇絕亦一作各偶分寄偶一作忽疑復笑復一作且

【看花】老病一作老翁年少一作少年

【和聖俞芸香】光輝一作光耀

【答原甫見過】佳果一作佳景

卷八

古詩二十一首

有贈余以端谿綠石枕與蘄州竹簟皆佳物也余既喜睡而得此二者不勝其樂奉呈原父舍人

聖俞直講

端谿琢出缺月樣蘄州織成雙水一作錦紋呼兒置枕展方簟赤日正午天無雲黃琉璃光綠玉潤瑩淨冷

滑無埃一作縷塵憶昨開封暫陳力屢乞殘骸避煩劇聖君哀憐大臣閱察見衰病非虛飾猶蒙不使如一作

加罪去特許遷官還舊職選材臨事不堪用見利無慚惟苟得一從一作就舍一作居城南官不坐曹門一作閑

少客自然唯與睡相宜。以懶遣一作閑。何愜適。從來羸爾苦疲困。況此煩歎正炎赫。少壯喘息人莫聽。中年鼻鼾尤惡聲。癡兒掩耳謂雷作。竈婦驚窺疑釜鳴。蒼蠅蟻蠓任緣撲。一作書。懶架拋縱橫。神昏氣濁一如此。言語思慮何由清。嘗聞李白好飲酒。欲與鐘杓同生死。一作我。今好睡。又過之。身與二物爲三爾。江西得請在旦暮。收拾歸裝從此始。終當卷簾攜枕去。築室買田清潁尾。

夜聞風聲有感奉呈原父舍人聖俞直講

夜半羣動息。有風生樹端。颯然飄我衣。起坐爲長歎。苦暑君勿厭。初涼君勿歡。暑在物猶盛。涼歸歲將寒。清霜忽以飛。零露亦溥溥。霜露一作時。本無情。豈肯私蕙蘭。不獨草木爾。君形安得完。櫛髮變新白。鑑容銷一作無。故丹風埃共侵迫。心志亦摧殘。萬古一飛隼。兩曜雙跳丸。擾擾賢與愚。流沙逐驚湍。其來固如此。獨久知誠難。服食爲藥悞。此言真不刊。但當飲美酒。何必被輕紈。

答梅聖俞大雨見寄

夕雲若頽山。夜雨如決渠。俄然見青天。燄燄升蟾蜍。倏忽陰氣生。四面如吹噓。狂雷走昏黑。驚電照夔臚。搜尋起龍蟄。下擊墓與墟。雷聲每軒轟。雨勢隨疾徐。初若浩莫止。俄收闌無餘。但掛千丈虹。紫翠橫空虛。頃刻百變態。晦明誰卷舒。豈知下土人。水潦沒襟裾。擾擾泥淖中。無異鴨與豬。嗟我來京師。庇身無弊廬。閉坊儼古屋。卑陋雜里閭。鄰注湧溝竇。街流溢庭除。出門愁浩渺。閉戶恐爲滌。牆壁豁四達。幸家無貯儲。

蝦蟆鳴竈下。老婦但歎歎。九門絕來薪。朝饔欲毀車。壓溺委性命。焉能顧圖書。乃知生堯時。未免憂爲魚。梅子猶念我。寄聲憂我居。慰我以新篇。琅琅比瓊瑀。官閑行能薄。補益愧空疎。歲月行晚矣。江湖盍歸歟。吾居傳郵爾。此計豈躊躇。

答聖俞白鸚鵡雜言

憶昨滁山之人贈我玉兔子。粵明年春玉兔_子死。日陽晝出月夜明。世言兔子望月生。謂此瑩然而白者。譬夫水之爲雪而爲冰。皆得一陰凝結之純精。常恨處非大荒窮。北極寒之曠野。養違其性。天厥齡。豈知火維地荒絕。漲海連天沸天_{一作火}。熱黃冠黑距人語言。有鳥玉衣尤皎潔。乃知物生天地中。萬殊難以一理通。海中洲_{一作島}窮人迹。來市廣州纔八國。其間注輦來最稀_{一作遠}。此鳥何年隨海舶。誰能徧歷海上峯。萬怪千奇安可極。兔生明月在天。玉兔不能久人間。况爾來從炎瘴地。豈識中州霜雪寒。渴雖有飲。飢有啄。羈繼終知非爾樂。天高海闊路_{一作終}茫茫。嗟爾身微羽毛弱。爾能識路知所歸。吾欲開籠縱爾飛。俾爾歸詫宛陵詩。此老詩名聞四夷。

清明前一日韓子華以靖節斜川詩見招遊李園既歸遂苦風雨三日不能出窮坐一室家人輩倒殘壺得酒數杯泥深道路無人行去市又遠索於篋_{一作篋}得枯魚乾鰕數種彊飲疾醉昏然

便寐既覺索然因書所見奉呈聖俞

少年喜追隨。老大厭諠譁。慚愧二三子。邀我行看花。花開豈不好。時節亦云嘉。因病既不飲。衆歡獨成一作我。嗟管絃暫過耳。風雨愁還家。三日不出門。堆厖類寒鴉。妻兒強我飲。釘飯果與瓜。濁酒傾殘壺。枯魚雜乾鰕。小婢立我前。赤脚兩髻丫。軋軋鳴雙絃。正如鸛嘔啞。坐令江湖心。浩蕩思無涯。寵祿不知報。鬢毛今已華。有田清潁間。尚可事桑麻。安得一黃犢。幅巾駕柴車。

奉答原甫見過寵示之作

不作流水聲。行將二十年。吾生少賤足憂患。憶昔有罪初南遷。飛帆洞庭入白浪。墮淚三峽聽流泉。援琴寫得入此曲。聊以自慰窮山間。中間永陽亦如此。醉臥幽谷聽潺湲。自從還朝戀榮一作祿。不覺鬢髮俱凋殘。耳衰聽重手漸顫。自惜指法將誰傳。偶欣日色曝書畫。試拂塵埃張斷絃。嬌兒癡女遶翁膝。爭欲彊翁聊一彈。紫微閣老適我過。愛我指下聲泠然。戲語一作君此是伯牙曲。自古常歎知音難。君雖不能琴。能得琴一作其意。斯爲賢。自非樂道甘寂寞。誰肯顧我相留連。興闌束帶索馬去。卻鎖塵匣包青氈。

會飲聖俞家有作兼呈原父景仁聖從

憶昨九日訪君時。正見堦前兩叢菊。愛之欲繞行百匝。庭下不能容我足。折花卻坐時嗅之。已醉還家手猶馥。今朝我復到君家。兩菊堦前猶對束。枯莖槁葉苦風霜。無復滿叢金間綠。京師誰家不種花。碧砌朱欄敞華屋。奈何來對兩枯株。共坐窮簷何局促。詩翁文字發天葩。豈比青紅凡草木。凡草開花數日間。天

龜無根長在目。遂令我每飲君家。不覺長餅臥牆曲。坐中年少皆賢豪。莫怪我今雙鬢禿。須知朱顏不可恃。有酒當歡飲。一作且相屬。

依韻奉酬聖俞二十五兄見贈之作

與君結交遊。我最先衆人。我少既多難。君家常苦貧。今爲兩衰翁。髮白面亦皺。念君懷中玉。不及市上珉。珉賤易爲價。玉棄久埋塵。惟能吐文章。白虹射星辰。幸同居京城。遠不隔重闈。朝罷二三公。隨我如魚鱗。君聞我來喜。置酒留逡巡。不待主人請。自脫頭上山。歡情雖漸鮮。老意益相親。窮達何足道。古來茲理均。

小飲坐中贈別祖擇之赴陝府無擇

明日君當千里行。今朝始共一罇酒。豈惟明日難重持。試思此會何嘗有。京師九衢十二門。車馬煌煌事奔走。花開誰得屢相過。蓋到莫辭頻舉手。驢情落寞酒量減。置我不須論老朽。奈何公等氣方豪。雲夢正當吞八九。擇之名聲重當世。少也多奇晚方偶。西州政事藹風謠。右掖文章煥星斗。待君歸日我何爲。手把鋤犂汝陰叟。

奉答聖俞達頭魚之作

吾聞海之大。物類無窮極。蟲蝦淺水間。羸蜺如山積。毛魚與鹿角。一一作拾數千百。收藏各有時。嗜好無南北。其微一作小。既若斯。其大有一作其大固。莫測。波濤浩渺中。島嶼生頃刻。俄而沒不見。始悟一作始出背。

脊有時隨潮來。暴死疑遭謫。海人相呼集。刀鋸爭剖一作析。骨節駭專車。鬚芒一作牙。倅劍戟。腥聞數十里。餘臭久乃息。始知百川歸。固有含容德。潛奇與秘寶。萬狀一作物。不一識。嗟彼達頭微。誰傳到一作偶傳入。京國乾枯少滋味。治平洗費炮灸。聊茲知異物。豈足薦佳客。一旦辱一作得。君詩虛名從此得。京師人不識。此魚滄州向防禦見寄。以分聖俞辱以詩答。

送刁紡推官一本無歸潤州

翹翹名家子。自少能慷慨。嘗從幕府辟。躍馬臨窮塞。是時西邊兵。屢戰輒一作無奔潰。歸來買良田。俛首學乘耒。家爲白酒醇。門掩青山對。優游可以老。世利何足愛。奈何從所知。又欲向并代。主人忽南遷。此計亦一作中悔。彼在吾往一作從。彼去吾亦退。與人交若此。可以言節概。

夜坐彈琴有感二首呈聖俞

吾愛陶靖節。有琴常自隨。無絃人莫聽。此樂有誰知。君子篤自信。衆人喜隨時。其中苟有得。外物竟何爲。寄謝伯牙子。何須鍾子期。

鍾子忽已死。伯牙其已乎。絕絃謝世人。知音從此無。瓠巴魚自躍。此事見於書。師曠嘗一鼓。羣鶴舞空虛。吾恐二三說。其言皆過歟。不然古今人。愚智邈已殊。奈何人有耳。不及烏與魚。

二月雪

事傷桃李花。無損杞與菊。杞菊吾所嗜。惟恐食不足。花開少年事。不入老夫目。老夫無遠慮。所急在口腹。風晴日暖雪初銷。踏泥自採籬邊綠。

歸田四時樂春夏二首

秋冬二首命聖俞分作。

春風二月三月時。農夫在田居者稀。新陽晴暖動膏脈。野水泛澗生光輝。鳴鳩聒聒屋上啄。布穀翩翩桑下飛。碧山遠映丹杏發。青草暖眠黃犢肥。田家此樂知者誰。吾獨知之胡不歸。吾已買田清潁上。更欲臨流作釣磯。

南風原頭吹百草。草木叢深茅舍小。麥穗初齊稚子嬌。桑葉正肥蠶食飽。老翁但喜歲年熟。餉婦安知時節好。野棠梨密啼晚鶯。海石榴紅囓山鳥。田家此樂知者誰。我獨知之歸不早。乞身當及彊健時。顧我蹉跎已衰老。

明妃曲和王介甫作

胡人以鞍馬爲家。射獵爲俗。泉甘草美無常處。鳥驚獸駭爭馳逐。誰將漢女嫁胡兒。風沙無情貌如玉。身行不遇中國人。馬上自作思歸曲。推手爲琵卻手瑟。胡人共聽亦咨嗟。玉顏流落死天涯。琵琶一作此曲卻傳來漢家。漢宮爭按新聲譜。遺恨已深聲更苦。纖纖女手生洞房。學得琵琶不下堂。不識黃雲出塞路。豈知此聲能斷腸。

盆池

西江之水何悠悠。經歷瀦石險。且回餘波拗。怒猶一作獨涵去澹。奔濤擊浪常喧逐。有時夜上滕王閣。月照淨練一作綠。無纖埃。楊闌左里在其北。無風浪起傳古來。老蛟深處獸窟穴。蛇身微行見者猜。呼龍灑酒未及祝。五色粲一作照。爛高崔嵬。忽然遠引千丈去。百里水面中分開。收蹤滅跡莫知處。但有雨雹隨風雷。千奇萬變聊一戲。豈一作肯願溺死為可哀。輕人之命若螻螳。不止山嶽將傾頽。此外魚鰕何足道。獸飲但覺腥盤杯。壯哉豈不快耳目。胡為守此空牆隈。陶盆斗水仍下漏。四岸久雨生莓苔。遊魚撥撥不盈寸。沉潛日炙愁暴鬚。魚誠不幸此踟促。我能決去反徘徊。

再和明妃曲

漢宮有佳一作美人。天子初未識。一朝隨漢使。遠嫁單于國。絕色天下無。一失難再得。雖能殺畫工。於事竟何益。耳目所及尚如此。萬里安能制夷狄。漢計誠已拙。女一作美色難自誇。明妃去時淚。灑向枝上花。狂風日暮起。飄泊落誰家。紅顏勝人多薄命。莫怨春風當自嗟。

奉送原甫侍讀出守永興一作奉送永興安撫劉侍讀

酌君以荊州魚枕之蕉。贈君以宣城鼠須之管。酒如長虹飲滄海。筆若駿馬馳平坂。愛君尚一作年少力方豪。嗟我久衰歎漸鮮。文章驚世知一作聞。名早意氣論交相得晚。魚枕蕉一舉十分當覆盞。鼠須管為物雖

微情不淺。新詩醉墨時一揮。別後寄我無辭遠。

哭聖俞

昔逢詩老伊水頭。青衫白馬渡伊流。灘聲八節響石樓。坐中辭氣凌清一作高秋。一飲百盞不言休。酒酣思逸語更遒。河南丞相稱賢侯。後車日載枚與鄒。我年最少力方優。明珠白璧相報投。詩成希深擁鼻謳。師魯卷舌藏戈矛。三十年間如轉眸。屈指十九歸山丘。凋零所餘身百憂。晚登玉墀侍珠旒。詩老蓋鹽太學愁。乖離會合謂無由。此會天幸非人謀。頰鬚已白齒根浮。子年加我貌則不。歡猶可彊閑屢偷。不覺歲月成淹留。文章落筆動九州。釜餽過午無饋餉。良時易失不早收。篋一作櫃中瓦礫遺琳瑯。薦賢轉石古所尤。此事有職非吾羞。命也難知理莫求。名聲赫赫掩諸幽。翩然素旆歸一舟。送子有淚流如溝。

熙寧五年秋七月男發等編定

紹熙二年三月郡人孫謙益校正

【石枕蘄簟】哀憐。一作矜憐。臨事。一作任事。嘗聞。一作昔時。好飲。一作愛飲。

【夜聞風聲】以飛。一作已飛。共侵迫。一作共一作苦。

【清明前一日奉呈聖俞】得酒。一作蜀酒。

【贈別祖擇之】煌煌。一作皇皇。落莫。一作莫。

【達頭魚】剖析一作

【夜坐彈琴】見於書一作載

【二月雪】事傷一作

歸田四時樂晚鶯一作

【明妃曲】無常處石本作漢宮一作

【盆池】楊闌左里一作揚輕人之命石本作魚誠石本作幸此石本作能決去反石本作

卷九

古詩三十首

寄題劉著作義叟家園效聖俞體

嘉子治新園。乃在太行谷。山高地苦寒。當樹所宜木。羣花媚春陽。開落一何速。凜凜心節奇。惟應松與竹。毋栽當暑槿。寧種深秋菊。菊死抱枯枝。槿豔隨昏旭。黃楊雖可愛。南土氣常燠。未知經雪霜。果自保其綠。顏色苟不衰。始知根性足。此外衆草花。徒能悅凡目。千金買姚黃。慎勿同流俗。

西齋小飲贈別陝州冲卿學士分得黃

今日胡不樂。衆賓會高堂。坐中瀛洲客。新佩太守章。豈無芳罇酒。笑語共一觴。亦有嘉一作佳菊叢。新苞弄微黃。所嗟時易晚。節物已淒涼。羣鷺方盛集。離鴻獨高翔。山川正搖落。行李怯風霜。君子樂爲政。朝廷須僞良。歸來紫微閣。遺愛在甘棠。

奉答原甫九月八日見過會飲之作

老大惜時節。少年輕別離。我歌君當和。我酌君勿辭。豔豔庭下菊。與君吟繞之。攜其黃金蕊。泛此白玉卮。君勿愛此花。問君此何時。秋風日益高。霜露漸離披。芳歲忽已晚。朱顏從此衰。念君將捨我。車馬去有期。君行一何樂。我意獨不怡。飛兔不戀羣。奔風誰能追。老驥但伏櫪。壯心良可悲。

予作歸鴈亭於滑州後十有五年梅公儀來守是邦因取余詩刻於石又以長韻見寄因以答之

一作和滑州公儀
龍圖歸鴈亭長句

風吹城頭秋草黃。仰見鳴雁初南翔。秋草風吹春復綠。南鴈北飛聲肅肅。城下臺邊桃李蹊。憶初披荒手植之。雪消冰解草木動。因記鴻一作欲鴈將歸時。爾來十載空遺迹。飛鴈年年自南北。臺傾餘址草荒涼。樹老無花春寂歷。東州太守詩尤美。組織文章爛如綺。長篇大句琢方石。一日都城傳百紙。我思古人無不然。慷慨感功名垂百年。沉碑身後念陵谷。把酒泣下悲山川。一時留賞雖邂逅。後世傳之因不朽。

寄題洛陽致政張少卿靜居堂

洛人皆種花。花發有時闌。君家獨種玉。種玉產琅玕。子弟守家法。名聲聳朝端。歲時歸拜慶。閭里亦相歡。西臺有道氣。自少服靈丸。春酒養眉壽。童顏如渥丹。清談不倦客。妙思喜揮翰。壯也已吏隱。與餘方掛冠。臨風想高誼。懷祿愧盤桓。

鬼車

嘉祐六年秋九月二十有八日。天愁無光。月不出。浮雲蔽天。衆星沒。舉手嚮空。如抹漆。天昏地黑。有一物。不見其形。但聞其聲。其初切切淒淒。或高或低。乍似玉女調玉笙。衆管參差而不齊。旣而啾啾啾啾。若軋若抽。又如百兩江州車。回輪轉軸聲。啞啞。嗚機夜織錦江上。羣鴈驚起蘆花洲。吾謂此何聲。初莫窮端。由老婢撲燈呼兒曹。云此怪鳥無正儔。其名爲鬼車。夜載百鬼。凌空遊。其聲雖小。身甚大。翅如車輪。排十頭。凡鳥有一口。其鳴已啾啾。此鳥十頭。有十口。口插一舌。連一^{一作}喉。一口出一聲。千聲百響。更相酬。昔時周公居東周。馱聞此鳥。憎若讎。夜呼庭氏。率其屬。彎弧俾逐出九州。射之三發。不能中。天遣天狗從空投。自從狗嚙一頭落。斷頸至今青血流。爾來相距三千秋。晝藏夜出。如鴿鶴。每逢陰黑。天外過。乍見火光。驚輒墮。有時餘血。下點污。鳥臥反。所遭之家。家必破。我聞此語。驚且疑。反祝疾飛。無我禍。我思天地何茫茫。百物巨細。理莫詳。吉凶在人不在物。一蛇兩頭。反爲祥。卻呼老婢。炷燈火。捲簾開戶。清華堂。須臾雲散。衆星出。夜靜皎月流清光。

感二子

黃河一千年一清。岐山鳴鳳不再一作鳴。自從蘇梅二子死。天地寂默收雷聲。百蟲坏戶不啓蟄。萬木逢春不發萌。豈無百鳥解言語。喧啾終日無人聽。二子精思極搜抉。天地鬼神無遁情。及其放筆騁豪俊。筆下萬物生光榮。古人謂此觀天巧。命短疑爲天公憎。昔時李杜爭橫行。麒麟鳳凰世所驚。二物非能致太平。須時太平然後生。開元天寶物盛極。自中原疲戰爭。英雄白骨化黃土。富貴何止浮雲輕。唯有文章爛日星。氣凌山岳常崢嶸。賢愚自古皆共盡。突兀空留後世名。

讀書

吾生本寒儒。老尚把書卷。眼力雖已疲。心意殊未倦。正經首唐虞。僞說起秦漢。篇章異句讀。解詁及箋傳。是非自相攻。去取在勇斷。初如兩軍一作兵交。乘勝方一作多酣戰。當其旗鼓催。不覺人馬汗。至哉天下樂。終日在一作書几案。念昔始從師。力學希仕宦。豈敢取聲名。惟期脫貧賤。忘食日已晡。燃薪夜侵旦。謂言得志一作意後。便可焚筆硯。少償辛苦時。惟事寢與飯。歲月不我留。一生今過半。中間嘗忝竊。內外職文翰。官禁日清近。廩給亦豐羨。人情慎所習。酖毒比安宴。漸追時俗流。稍稍學營辦。盃盤窮水陸。賓客羅俊彥。自從中年來。人事攻百箭。非惟職有憂。亦自老可歎。形骸苦衰病。心志亦退懦。前時可喜事。閉眼不欲見。惟尋舊讀書。簡編一作編簡多朽斷。古人重溫故。官事幸有間。乃知讀書勤。其樂固無限。少而干祿利。老用忘憂慮。

又知物貴久。至寶見百鍊。紛華暫時好。俯仰浮雲散。淡泊味愈長。始終殊不變。何時乞殘骸。萬一免罪譴。買書載舟歸。築室一作屋。穎水岸。平生頗論述。銓次加點竄。庶幾垂後世。不默死芻豢。信哉蠹書魚。韓子語非訕。

鵲鳩詞效王建作

龍樓鳳闕一作閣。鬱崢嶸。深宮不聞更漏聲。紅紗蠟燭愁夜短。綠窗鵲鳩催天明。一聲兩聲人漸起。金井轆轤聞汲水。三聲四聲促嚴粧。紅靴玉帶奉君王。萬年枝軟風露濕。上下枝間聲轉急。南衙促仗三衛列。九門放鑰千官入。重城禁鑰鎖池臺。此鳥飛從何處來。君不見穎河東岸村一作春。陂闊山禽野鳥常一作時。嘲啮田家惟聽夏鷄聲。鵲鳩京西村人謂之夏鷄。夜夜墉頭耕曉月。可憐此樂獨吾知。眷戀君恩今白髮。

初食鷄頭有感一本無有感字

六月京師暑雨多。夜夜南風吹芡芰。凝祥池鎖會靈園。僕射荒陂安可擬。京師賣五岳宮及鄭州鷄頭最為佳。爭先園客採新苞。剖蚌得珠從海底。都城百物貴新鮮。厥價難酬與珠比。金盤磊落何所薦。滑臺撥醅如玉醴。自慚竊食萬錢廚。滿口飄浮嗟病齒。却思年少在江湖。野艇高歌菱苳裏。香新味全手自摘。玉潔沙磨軟還美。一瓢固不羨五鼎。萬事適情為可喜。何時遂一作益。買穎東田歸去結茅臨野水。

雙井茶

西江水清江石老。石上生茶如鳳爪。窮臘不寒春氣早。雙井芽生先百草。白毛囊以紅碧紗。十斤茶養一兩芽。長安富貴五侯家。一啜猶須三日誇。寶雲日注非不精。爭新棄舊世人情。豈知君子有常德。至寶不隨時變易。君不見建溪龍鳳團。不改舊時香味色。

贈李士寧

蜀狂士寧者。不邪亦不正。混世使人疑。詭譎非一行。平生不把筆。對酒時高詠。初如不著意。語出多奇勁。傾財解人難。去不道名姓。一無上六句金一作千錢買酒醉高樓。明月空牀清風一作眠不醒。一身四海卽爲家。獨行萬里聊乘興。既不採藥賣都市。又不點石化黃金。進不干公卿。退不隱山林。與之游者一本四字。但愛其人而莫不一作見其術。安知其心。吾聞有道之士。游心太虛。逍遙出入一本二句止。與道俱。故能入火不熱。一作入水不濡。嘗聞其語一作吾雖。而未見其人也。豈斯人之徒與。不然。言不純師。行不純德。一作而一本無滑稽玩一作世。其東方朔之流乎。

明妃小引

漢宮諸女嚴粧罷。共送明妃溝水頭。溝上水聲來不斷。花隨水去不回流。上馬卽知無返日。不須出塞始堪愁。

感事四首

老者覺時速。閑人知日長。日月本無情。人心有閑忙。努力取功名。斷碑埋路傍。逍遙林下士。丘壠亦相望。長生既無藥。濁酒且盈觴。

空山一道士。辛苦學延齡。一旦隨物化。反言仙已成。開墳見空棺。謂已超青冥。尸一作解如蛇蟬。換骨蛻其形。既云須變化。何不任死生。

仙境不可到。誰知仙有無。或乘九斑虬。或駕五雲車。朝倚扶桑枝。暮遊崑崙墟。往來幾萬里。誰復遇諸涂。富貴不還鄉。安事富貴歟。神仙人不見。魍魎與爲徒。人生不免死。魂魄入幽都。仙者得長生。又云超太虛。等爲不在世。與鬼亦何殊。得仙猶若此。何況不得乎。寄謝山中人。辛勤一何愚。

莫笑學仙人。山中苦岑寂。試看青松鶴。何似朱門客。朱門炙手熱。來者無時息。何嘗問寒暑。豈暇謀寢食。疆顏悅憎怨。擇語防仇敵。衆欲苦無厭。有求期必獲。敢辭一身勞。豈塞天下責。風波卒然起。禍患藏不測。神仙雖杳茫。富貴竟何得。

新春有感寄常夷甫

余生本羈孤。自少已非壯。今而老且病。何用苦惆悵。誤蒙三聖知。貪得過其量。恩私未知報。心志已凋喪。軒裳德不稱。徒自取譏謗。豈若常夫子。一瓢安陋巷。身雖草莽間。名在朝廷上。惟余服德義。久已慕恬曠。矧亦有吾廬。東西正相望。不須駕柴車。自可策藜杖。坐驚顏鬢日。摧頽及取新春歸。去來共載一舟浮野。

水焦陂四面百花開。

昇天檜

青牛西出關。老聃始著五千言。白鹿去昇天。爾來忽已三千年。當時遺迹至今在。隱起蒼檜猶依然。惟能乘變化。所以爲神仙。驅鸞駕鶴須臾間。飄忽不見如雲煙。奈何此鹿起平地。更假草木相攀緣。乃知神仙事。茫昧真僞莫究徒自傳。雪霜不改終古色。風雨有聲當夏寒。境清物老自可愛。何必詭怪窮根源。

憶焦陂

一本無憶字。注汝陰作。

焦陂荷花照水光。未到十里聞花香。焦陂八月新酒熟。秋水魚肥鱸如玉。清河兩岸柳鳴蟬。直到焦陂不下船。笑向漁翁酒家保。金龜可解不須錢。明日君恩許歸去。白頭酣詠太平年。

贈許道人

洛城三月亂鶯飛。潁陽山中花發時。往來車馬遊山客。貪看山花踏山石。紫雲仙洞鎖雲深。洞中有人人不識。飄飄許子旌陽後。道骨仙風本仙骨。多年洗耳避世喧。獨臥寒巖聽山溜。至人無心不算心。無心自得無窮壽。忽來顧我何慙慙。笑我白髮老紅塵。子歸爲築巖前室。待我明年乞得身。

送龍茶與許道人

潁陽道士青霞客。來似浮雲去無蹟。夜朝北斗太清一作虛壇。不道姓名人不識。我有龍團古蒼壁。九龍泉

深一百尺。憑君汲井試烹之。不是人間香味色。

馴鹿

朝渴飲清池。暮飽眠深柵。慚媿主人恩。自非殺身難報德。主人施恩不待報。哀爾胡爲網羅獲。南山藹藹動春陽。吾欲縱爾山之傍。巖崖雪盡飛泉溜。澗谷風吹百草香。飲泉留草當遠去。山後山前射生戶。

留題齊州舜泉

岸有時而爲谷。海有時而爲田。虞舜已歿三千年。耕田浚井雖鄙事。至今遺迹存依然。歷山之下有寒泉。向此號泣于旻天。無情草木亦改色。山川慘淡生雲煙。一朝垂衣正南面。臯夔稷契來聯翩。功高德大被萬世。今人過此猶留連。齊州太守政之暇。鑿渠開沼疏清漣。遊車擊轂惟恐後。衆卉亂發如爭先。豈徒邦人知樂此。行客亦爲留征軒。

山齋戲書絕句二首

蜜脾未滿蜂採花。麥壠已深鳩喚一作雨。正是山齋睡足時。不覺花間日亭午。經春老病不出門。坐見羣芳爛如雪。正當年少惜花時。日日春風吹石裂。

嘲少年惜花

紛紛紅藥落泥沙。少年何用苦咨嗟。春風自是無情物。肯爲汝惜無情花。今年花落明年好。但見花開人

自老人老不復少。花開還更一作復。新使花如解語。應笑惜花人。

出郊見田家蠶麥已成慨然有感

誰謂田家苦。田家樂有時。車昌遮切。鳴緝白繭。麥熟轉黃鸝。田家此樂幾人知。幸獨知之未許歸。逢時得寵已逾分。報國無能徒爾爲。收取玉堂揮翰手。却尋南畝把鋤犁。

射生戶予初至州獵戶有獻狼豹者

射生戶前日獻一豹。今日獻一狼。豹因傷我牛。狼因食我羊。狼豹誠爲害人物。縣官賞之縑五疋。射生戶持縑歸。爲人除害固可賞。貪功趨利爾勿爲。弦弓毒矢無妄發。恐爾不識麒麟兒。

戲石唐山隱者

石唐山室紫雲深。潁陽真人此算心。真人已去升寥廓。歲歲巖花自開落。我昔曾爲洛陽客。偶向巖前坐盤石。四字丹書萬仞崖。神清之洞鎖樓臺。雲深路絕無人到。鸞鶴今應待我來。

熙寧五年秋七月男發等編定

紹熙二年三月郡人孫謙益校正

【西齋小飲】衆賓一作賢

【歸鴈亭】仰見一作看

【食雞頭】都城一作都人

【感事】苦無獸作苦一作食

【昇天檜】自傳一作相傳

【嘲少年惜花】紅藥一作紅紫

【出郊有感】鳴緜一作緜一

【鶉鷄詞】促仗碑本促作捉似重磨再刻案唐書儀衛志三衛番上分爲五仗又云帶刀捉仗列坐于東

州大抗本並作作吉州鎖池臺鎖碑

卷十

律詩六十首

送王汲宰藍田

喧喧動車馬，共出古都門。落日催行客，東風吹酒罇。樹搖秦甸綠，花入輞川繁。若遇西來旅，時應問故園。

徽安門曉望

歐陽文忠公集

二律詩

都門收宿霧。佳氣鬱葱蔥。曉日寒川上。青山白霧一作露中。樓臺萬瓦合。車馬九衢通。恨乏登高賦。徒知京邑雄。

送孟都官知蜀州

名郎出粉闈。佳郡古關西。幾驛秦亭盡。千山蜀鳥啼。朱輪照耕野。綠芋覆秋畦。向闕應東望。雲深隴樹迷。
南征回京至界上驛先呈城中諸友

朝雲來少室。日暮向箕山。本以無心出。寧隨倦客還。春歸伊水綠。花晚洛橋閑。誰有餘鱗酒。和期一解顏。

逸老亭一本注彭城公白蓮莊

上相此忘榮。怡然物外情。池光開小幌。山翠入重城。野鳥窺華袞。春壺勞耦耕。枕前雙鴈沒。雨外一川晴。
解組金龜重。調琴赤鯉驚。雖懷安石趣。豈不爲一作念蒼生。

廣愛寺

都人布金地。紺宇巋然存。山氣蒸經閣。鍾聲出國門。老杉春自綠。古壁雨先昏。應有幽人屐。來留石藓痕。
弔黃學士三首名鑑

麗正讎書久。蘭臺約史成。迎親就江水。厭直出承明。世德無雙譽。詩豪第一評。風流今頓盡。想像憶平生。
沈約多清瘦。文園仍病瘠。共疑天上召。更欲水邊招。金馬人相弔。長沙物易妖。秋風吹越樹。歸旆自飄飄。

自古關衰早。因令蕙歎深。書遺茂陵藁。病作越鄉吟。蒿里無春色。閩山蔽夕陰。空嗟埋玉樹。齋志永沉沉。
雨後獨行洛北

北闕望南山。明嵐雜紫煙。歸雲向嵩嶺。殘雨過伊川。樹繞芳隄外。橋橫落照前。依依半荒苑。行處獨聞蟬。

陪府中諸官遊城南南一本注
西京作

一雨郊圻迴。新秋榆棗繁。田荒溪溜入。禾熟雀聲喧。燒出空棧腹。人耕廢廟垣。閑追向城客。落日隱高原。
智蟾上人遊南岳

終日念雲壑。南歸心浩然。青山入楚路。白水望湖田。野渡惟浮鉢。山家少施錢。到時春尚早。收茗綠巖前。
送左殿丞直一作入蜀

傳聞蜀道難。行客若登天。紫竹深無路。黃花忽見川。聞禽嗟異域。問俗訪耆年。欲識京都遠。惟應望日邊。
秋郊曉行望一作

寒郊桑柘稀。秋色曉依依。野燒侵河斷。山鴉向日飛。行歌採樵去。荷鋤刈一作治。田歸一作秫一作村。酒家家熟。相
邀白竹扉。

被牒行縣因書所見呈僚友

周禮恤凶荒。輶車出四方。土龍朝祀雨。田火夜驅蝗。木落孤村迴。原高百草黃。亂鴉鳴古堞。寒雀聚空倉。

桑野人行。鱸魚陂鳥下梁。晚煙茅店月。初日棗林霜。墟戶催寒候。叢祠禱歲穰。不妨行覽物。山水正蒼茫。
緱氏縣作

亭候徹郊畿。人家嶺坂西。青山臨古縣。綠竹繞寒溪。道上行收穗。桑間晚溉畦。東臯有深趣。便擬卜幽棲。
又行次作

秋色滿郊原。人行禾黍間。雉飛橫斷澗。燒響入空山。野水蒼煙起。平林夕鳥還。嵩嵐久不見。寒碧更孱顏。
送梅秀才歸宣城

從學方年少。還家罄橐金。久爲江北客。能作洛生吟。罷亞霜前稻。鉤輅竹上禽。歸帆何處落。應拂野梅林。
鞏縣陪祭獻懿二后回孝義橋道中作

落日漢陵道。初寒慘暮飈。遙看山口火。暗渡洛川橋。不見新園樹。空聞引葬簫。林鷓棲已定。猶一作獨此倦
征鏢。

送謝學士歸闕

供帳拂朝煙。征鞍去莫攀。人醒風外酒。馬度雪中關。舊府誰同在。新年獨未還。遙應行路者。偏識綵衣斑。
河南王尉西齋

寒齋日蕭索。天外敞簷楹。竹雪晴猶覆。山窗夜自明。禽歸窺野客。雲去入重城。欲就陶潛飲。應須載酒行。

張主簿東齋

官舍掩寒扉。聊同隱者棲。溪流穿竹過。一作山鳥入城啼。賓主高談勝。心冥外物齊。惟應朝枕夢。長耿隔

鄰林。一作雞。

留守相公禱雨九龍祠應時獲澍呈府中同僚

古木鬱沉沉。祠亭相袞臨。雷驅山外響。雲結日邊陰。飄驟來初合。依微勢稍深。土膏潛動脈。野氣欲成霖。隴上連雲色。田間擊壤音。明光應奏瑞。黃屋正焦心。帝邑三川美。離宮萬瓦森。廢溝鳴故苑。紅蘓發青林。南畝猶須勸。餘春尙可尋。應容後車一作客。時作洛生吟。

春日獨遊上林院後亭見櫻桃花奉寄希深聖俞仍酬遞中見寄之什

昔日尋春地。今來感歲華。人行已荒徑。花發半枯槎。高榭林端出。殘陽水外斜。聊持一罇酒。徙倚憶天涯。

獨至香山憶謝學士一作希深

伊水弄春沙。山臨水上斜。曾爲謝公客。徧一作入梵王家。陰澗初生草。春嶺自落花。却尋題石處。歲月已堪嗟。

春晚同應之偶至普明寺小飲作

偶來林下逕。共酌竹間亭。積雨添芳草。一作沼。殘花點綠萍。野陰侵席潤。芳氣襲人醒。禽鳥休驚顧。都忘兀

爾形。

黃河八韻寄呈聖俞

河水激箭險。誰言航葦遊。堅冰馳馬渡。伏浪卷沙流。樹落新摧岸。湍驚忽改洲。鑿龍時退鯉。漲潦不分牛。萬里通槎漢。千帆下漕舟。怨歌今罷築。故道失難求。灘急風逾響。川寒霧不收。詎能窮禹迹。空欲問張侯。和應之同年。兄秋日雨中登廣愛寺閣寄梅聖俞

經年都洛與君交。共許詩中思最豪。舊社更誰能擁鼻。新秋有客獨登高。徑蘭欲謝悲零露。籬菊空開乏凍醪。縱使河陽花滿縣。亦應留滯感潘毛。

晚過水北

寒川消積雪。凍浦漸通流。日暮人歸盡。沙禽上釣舟。

罷官西京回寄河南張主簿

歸客下三川。孤郵暫解鞍。鳥聲催暮急。山氣欲晴寒。已作愁霖詠。猶懷祖帳歡。更聞溪溜響。疑是石樓灘。

寄西京張法曹

幕府三年客。羣居幾日親。初分闕一作口路。猶見洛陽人。壠麥晴將秀。田花晚自春。向家行漸近。豈復倦征輪。

離彭婆值雨投臨汝驛回寄張九屯田司錄

投館野花邊。羸驂晚不前。山橋斷行路。溪雨漲春田。樹冷無棲鳥。村深起暮煙。洛陽山已盡。休更望伊川。

朱家曲一本有并引字

朱家曲自許縣北門上赤坂岡分道西行入小路三十里有村市臨古河商賈之販京師者舟車皆會此居民繁雜宛然如江鄉予以事偶至此宿旅邸明日遂赴京師

行人傍衰柳。路向古河窮。桑柘田疇美。漁商市井通。薪歌晚入浦。舟子夜乘風。旅舍孤煙外。天京王氣中。山川許國近。風俗楚鄉同。宿客雞鳴起。驅車猶更東。

行至椹澗作

霜後葉初鳴。羸驂遶澗行。川原人遠近。禾黍日晴明。病質驚殘歲。歸塗厭一作暮程。空林聚寒雀。疑已作春聲。

送謝希深學士北使

漢使入幽燕。風煙兩國間。山河持節遠。亭障出疆閑。征馬聞笳躍。雕弓向月彎。禦寒低便面。贈客解刀環。鼓角雲中壘。牛羊雪外山。穹廬鳴朔吹。凍酒發一作朱顏。塞草生侵磧。春榆綠滿關。應須鴈北嚮。方值使南還。

送賈推官赴絳州

歐陽文忠公集 二律詩

白雲汾水上。人北鴈南飛。行李山川遠。風霜草木腓。郡齋賓榻掛。幕府羽書稀。最有題輿客。偏思玉麈揮。

送張如京知安肅軍

相逢舊從事。新命忽臨戎。界上山河壯。軍中鼓角雄。朔風馳駿馬。塞雪射驚鴻。試取封侯印。何如筆硯功。

送威勝軍張判官

北地不知春。惟看榆葉新。岑牟多武士。玉麈重嘉賓。野燐一作燒驚行客。烽煙入遠營一作暮。塵繫書沙上。鴈時寄日邊人。

送同年史褒之武功尉

久作遊邊客。常悲入塞笳。今茲一尉遠。猶困折腰嗟。白馬關中道。青天一作煙棧外家。過秦應弔古。惟有故山斜。

送祝熙載之東陽主簿

吳江通海浦。畫舸候潮歸。疊鼓山間響。高帆鳥外飛。孤城秋枕水。千室夜鳴機。試問還家客。遼東今是非。

鄭十一先輩赴四明幕一本注初授洋川辭不行

梁漢褒斜險。夫君畏遠遊。家臨越山下。帆入海潮頭。岸柳行稍盡。江蓴歸漸秋。故鄉看衣錦。寧羨李膺舟。

送丁元珍峽州判官一作送朱處仁

爲客久南方，西游更異鄉。江通蜀國遠，山閉楚祠荒。油幕無軍事，清猿斷客腸。惟應陪主諾，不費日飛觴。

送楚建中潁州法曹

冠蓋盛西京，當年相府榮。曾陪鹿鳴宴，偏一作識洛陽生。共歎長沙謫，空存許劭評。堪嗟桃李樹，何日見陰成。

送王尙恭隰州幕

去國初游宦，從軍苦寂寥。愁雲帶一作城起，畫角向山飄。秋勁方馳馬，春寒正襲貂。遙知爲客恨，應賴酒盃消。

送王尙喆三原尉

初仕便西轅，驪駒兩佩環。山河識天府，風雨度函關。桑柘千疇富，人煙萬井閑。欲爲京洛詠，應苦簿書間。

送餘姚陳寺丞勗

銅墨佩腰間，中流望若一作仙。鳴蟬汴河柳，畫鷁越鄉船。下瀨逢江鴈，瞻氛落海鳶。山川仍客思，盡入隱侯篇。

送廖八下第歸衡山

曾作關中客，嘗窺百二疆。自言秦隴一作嶺，水能斷楚人腸。失意倦京國，羈愁成鬢霜。何如伴征鴈，日日向

衡陽。

夏侯彥濟武陟尉

風煙地接懷井邑。富田垓河近。聞冰坼山高。見雨來官閑同小隱。酒美足銜盃。好去東籬菊。迎霜正欲開。

遠山

山色無遠近。看山終日行。峯巒隨處改。行客不知名。

宋宣獻公挽詞三首

望繫朝廷重。文推天下工。清名畏楊綰。故事問胡公。物議垂爲相。風流頓已窮。仁言博哉利。獻替有遺忠。識度推明哲。風猷藹縉紳。何言止中壽。遂不乘洪鈞。翰墨時爭寶。詞章晚愈新。哀文伯母。悲感路傍人。結髮一作逢明主。馳聲著兩朝。奠楹先有夢。升屋豈能招。贈服三公袞。兼榮七葉貂。春風笳鼓咽。松柏助蕭蕭。

初出眞州泛大江作

孤舟日日去無窮。行色蒼茫杳靄中。山浦轉帆迷向背。夜江看斗辨西東。滄田漸下雲間鴈。霜日初丹水上楓。蓴菜鱸魚方有味。遠來猶喜及秋風。

江行贈鴈

雲間征鴈水間樓。增繳方多羽翼微。歲晚江湖同是客。莫辭伴我更南飛。

松門已下五首一本
屬夷陵九詠

島嶼松門數里長。懸崖對起碧峯雙。可憐勝境一作景當窮塞。翻使留流一作人戀此邦。亂石驚灘喧醉枕。淺沙明月入船窗。因遊始覺南來遠。行盡荆江見蜀江。

下牢津

依依下牢口。古戍鬱嵯峨。入峽江漸曲。轉灘山更多。白沙飛白鳥。青障一作嶂合青蘿。遷客初一作嘗經此。愁詞作楚歌。

龍溪

潺潺出亂峯。演漾綠蘿風。淺瀨寒難涉。危槎路不通。朝雲起潭側。飛雨徧江中。更欲尋源去。一作山深不可窮。

勞停驛

孤舟轉山曲。豁爾見平川。樹杪帆初落。峯頭月正圓。荒煙幾家聚。瘦野一刀田。行客愁明發。驚灘鳥道前。

黃溪夜泊

楚人自古登臨恨。暫到愁腸已九回。萬樹蒼煙三峽暗。滿川明月一猿哀。非鄉况復驚殘歲。慰客偏宜把

酒盃行見江山一作山河且吟詠不因遷謫豈能來。

望州坡

聞說夷陵人爲愁共言遷客不堪遊。崎嶇幾日山行倦。卻喜坡頭見峽州。

熙寧五年秋七月男發等編定

紹熙二年三月郡人孫謙益校正

【逸老亭】雨外一作後

【弔黃學士】越鄉一作山

【被牒行縣呈寮友】一作呈諸寮友

【行次作】寒碧一作凝碧

【東齋】賓主一作至

【黃河】馳馬一作無馬

【和應之登廣愛寺閣】經年一作終年

【江行贈鴈】征鴈一作秋鴈

卷十一

律詩五十七首

初至夷陵答蘇子美見寄

三峽倚岩嶢。一作同南遷地最遙。物華雖可愛。鄉思獨無聊。江水流青嶂。猿聲在碧霄。野篁抽夏筍。叢橘長

春條。未臘梅先發。經霜葉不凋。江雲愁一作懸蔽日。山霧晦連朝。斫谷爭收漆。梯林鬪摘椒。巴賓船一作賈集。

巴江船賈至蠻市酒旗招。時節同荆俗。民風載楚謠。俚歌成調笑。一作擦鬼聚喧囂。夷陵之俗多淫奔又好祠祭每遇祠時里民數百共

餽其餘里語謂之擦鬼因此多成鬪訟得罪宜投裔。包羞分折腰。光陰催晏歲。牢落慘驚飈。白髮新年出。朱顏異域銷。縣樓

朝見虎。官舍夜聞鴞。寄信無秋鴈。思歸望斗杓。須知千里夢。長繞洛川橋。

冬後三日陪丁元珍遊東山寺

幕府文書日已稀。清罇歲晏喜相攜。寒山帶郭穿松路。瘦馬尋春踏雪泥。翠蘚蒼崖森古木。綠蘿盤石暗

深溪。為貪賞物來猶早。迎臘梅花吐未齊。

送前巫山宰吳殿丞字照

俊域當年仰下風。天涯今日一罇同。高文落筆妙天下。清論揮犀服坐中。江上掛帆明月峽。雲間謁帝紫

微宮。山城寂寞少嘉客。喜見瓊枝一作林慰病翁。

龍興寺小飲呈表臣元珍

平日相從樂會文，博鼻壺馬占朋分。罰籌多似昆陽矢，酒令嚴於細柳軍。蔽日雪雲猶靄靄，欲晴花氣漸氤氳。一罇萬事皆毫末，螺贏螟蛉豈足云。

縣舍不種花惟栽楠木冬青茶竹之類因戲書七言四韻

結綬當年仕兩京，自憐年少體猶輕。伊川洛浦尋芳徧，魏紫姚黃照眼明。客思病來生白髮，山城春至少紅英。芳叢密葉聊須種，猶得蕭蕭聽雨聲。

至喜一作虛白堂新開北軒手植楠木兩株走筆呈元珍表臣

爲憐碧砌宜佳樹，自斲蒼苔選綠叢。不向芳菲一作赴開落，直須霜雪見青葱。披條滋轉清晨露，響葉蕭騷半夜風。時掃濃陰北窗下，一椀閑且伴衰翁。

戲答元珍一本下云花時久雨之什

春風疑不到天涯，二月山城未見花。殘雪壓枝猶有橘，凍雷驚筍欲抽芽。夜聞歸鴈生鄉思，病入新年一作鳥聲漸變知芳節人意無聊感物華。曾是洛陽花下客，野芳雖晚不須嗟。

初晴獨遊東山寺五言六韻

日暖東山去，松門數里斜。山林隱者趣，鍾鼓梵王家。地僻遲春節，風晴變一作別物華。雲光漸容與，鳥哢已

交加冰下泉初動，煙中茗未芽。自憐多病客，來探欲開花。

夷陵歲暮書事呈元珍表臣一本作元珍判官表臣推官

蕭條雞犬亂山中，時節崢嶸忽幾一作已窮。遊女髻鬟風俗古，野巫歌舞歲年豐。夷陵俗朴陋，惟歲暮祭鬼，則男女數百相從而樂飲。

夷陵俗下，一本有古字。平時都邑今為陋，敵國江山昔最雄。三國時吳蜀戰爭於此。荆楚先賢多勝迹，不辭攜酒

問鄰翁。處士何參居縣舍西，好學，多知荆楚故事。

夷陵書事寄謝三舍人一作代書寄舍人三丈

春秋楚國西偏境，陸羽茶經第一州。紫籜青林長蔽日，綠叢紅橘最宜秋。道塗處險人多負，邑屋臨江俗

善泅。臘市漁魚一作鹽朝暫合，淫祠簫鼓歲無休。風鳴燒入空城響，雨惡江崩斷岸流。月出行歌聞調笑，花

開啼鳥亂鉤輈。一本有訟庭畫地通人語，邑政觀風問俚謳。土俗雖輕人自樂，山川信美客偏愁。四句。黃牛峽口經新歲，白玉京中夢舊遊。曾是洛

陽花下客，欲誇風物向君羞。

戲寄一作贈丁判官

西陵江口折寒梅，爭勸行人把一一作酒。孟須信春風無遠近，維舟處處有花開。

寄梅聖俞一本注夷陵作

青春一作山四顧亂無涯，雞犬蕭條數百家。楚俗歲時多雜鬼，蠻鄉一作言語不通華。繞城江急舟難泊，嘗

縣山高日易斜。擊鼓踏歌成夜市。邀龜卜雨趁燒春。一作春。禽叢林白晝飛妖鳥。庭砌非時見異花。惟有山川爲勝絕。寄人堪作畫圖誇。

離峽州後回寄元珍表臣一本作元珍判官表臣推官

經年遷謫狀荆蠻。惟有江山興未闌。醉裏人歸青草渡。夢中船下武牙灘。野花零落亂風前。一作亂舞。飛雨蕭條江上寒。荻筍時魚方有味。恨無佳客共盃盤。

再至西都一作寄謝希深

伊川不到十年間。魚鳥今應怪我一作我自還。浪得浮名銷壯節。羞將一作看。白髮見對青山。野花向客開如一作異花。向我情猶笑。芳草留人意自閑。却到一作行至。謝公題壁處。向風清淚獨一作臨風。潺湲。

過錢文僖公白蓮莊

城南車馬地。行客過徘徊。野水寒猶入。餘花晚自開。命賓曾授簡。開府最多才。今日西州路。何人更獨來。

謝公挽詞三首

始見行春旆。俄聞引葬簫。笑言猶在耳。魂魄遂難招。天象奎星暗。辭林玉樹凋。朔風吹霰雪。銘旆共飄飄。前日賓齋宴。今晨奠柩觴。死生公自達。存沒世徒傷。舊國難歸葬。餘貲不給喪。平生公輔志。所一作得在文章。

樂事與良辰。平生愛洛濱。泉臺一閉夜。蒿里不知春。翰墨猶新澤。圖書已素塵。堪憐寢門哭。猶有舊時賓。

愁牛嶺

邦人盡自一作說畏愁牛。牛愁一作不獨牛愁我亦愁。終日下一作山行百轉。却從山脚望山頭。

寄子山待制二絕一本後篇作別 鎮陽寄沈待制

留滯西山獨可嗟。殘春過盡始還家。落花縱有那堪醉。一作看何況歸時無落花。

聞君屢醉賞紅英。落盡殘花酒未醒。嗟我落花無分看。莫嫌狼藉掃中庭。

寄秦州田元均

由一作來邊將用儒臣。坐以威名撫漢軍。萬馬不嘶聽號令。諸蕃無事著一作耕耘。夢回夜帳聞羌笛。詩

就高樓對隴一作雲。莫忘一作鎮陽遺愛在一作地。北潭桃李正氛氳。一作春深桃

送沈待制陝西都運邀

幾歲瘡痍近息兵。經營方喜得時英。從來漢粟勞飛輓。當使秦人自戰耕。道左旌旗諸將列。馬前弓一作箭

劍六蕃迎。知君材力多閑暇。剩聽陽關醉後聲。

樂城遇風效韓孟聯句體

歲暮氛霾惡。冬餘氣候爭。吹噓回暖律。號令發新正。遠響來猶漸。狂奔勢益橫。頽城慶戰鼓。掠野過陰兵。

掃蕩無餘靄，顛摧鮮立莖。五山搖岌嶮，九鼎沸煎烹。玉石焚岡裂，波濤卷海傾。遙聽午合市，爭呼夜驚營。
慘極雲無色，陰窮火自生。電鞭時畵劃，雷軸助喧轟。孔竅千聲出，陰幽百怪呈。狐妖憑莽蒼，鬼焰走青荧。
奮怒痛增悚，中休耳暫清。胡兵占月暈，江客候蟲鳴。飄葉千艘失，飛空萬瓦輕。獵豪添馬健，舶穩想帆征。
畏壓頻移席，陰祈屢整纓。凍消初醒蟄，枯活欲抽萌。病體愁山館，春寒賴酒鐙。雞號天地白，登壘看晴明。

過中渡二首

中渡橋邊十里堤，寒蟬一作梅落盡柳條衰。年年塞下春風晚，誰見輕黃弄色時。

得歸還自歎淹留，中渡橋邊柳拂頭。記得來時橋上過，斷冰殘雪滿河流。

自河北貶滁州初入汴河聞鴈

陽城淀裏新來鴈，趁伴南飛逐一作何事來隨南。越船野岸柳黃霜正白，五更驚破客愁眠。

自勉

引水澆花不厭勤，便須已有鎮陽春。官居處處如郵傳，誰得三年作主人。

席上送劉都官

都城車馬日喧喧，雖有離歌不慘顏。豈似客亭臨野岸，暫留罇酒對青山。天街樹綠騰歸騎，玉殿霜清綴曉班。莫忘西亭曾醉處，月明風溜響潺湲。

寄劉都官

別後山光寒更綠。秋深酒美色仍清。繞亭黃菊同君種。獨對殘芳醉不成。

書王元之畫像側在鄆郡山

偶然來繼前賢迹。信矣皆如昔日言。諸縣豐登少公事。一家飽暖荷君恩。想公風采常如在。顧我文章不足論。名姓已光青史上。壁間容貌任塵昏。公貶滁州謝上表云。諸縣豐登。苦無公事。一家飽暖。共荷君恩。

送京西提刑趙學士

題輿嘗屈佐留京。攬轡今行一作來。按屬城。楚館尙看淮月色。嵩雲應過虎關迎。春寒酒力風中醒。日暖梅香雪後清。野俗經年留惠愛。莫辭臨別醉冠傾。

寄題宜城縣射亭

作邑三年事事勤。宜城風物自君新。已能爲政留遺愛。何必栽花遺後人。藹若芝蘭芳可襲。溫如金玉粹而純。友朋欣慕自如此。何況斯民父母親。

豐樂亭遊春三首

綠樹交加山陰野。一作新鳥啼晴風蕩漾落斜日。一作晚晴花飛鳥歌花舞太守醉。明日一作月酒醒春已色。一作歸。春雲淡淡日輝輝。草惹行襟絮拂衣。行到亭西逢太守。籃輿酩酊插花歸。

紅樹青山日欲斜。長郊草色綠無涯。遊人不管春將老。一作來往空逸亭前踏落花。

謝判官幽谷種花

淺深紅白宜相間。先後仍須次第栽。我欲四時攜酒去。莫教一日不花開。

畫眉鳥一作郡齋

百轉千聲隨一作意移。山花紅紫樹高低。始知鎖向金籠聽。不及林間自在啼。

懷嵩樓新開南軒與郡僚小飲

繞郭雲煙一作閣匝。幾重昔人曾此感懷嵩。霜林落後山爭出。野菊開時酒正濃。解帶西風飄畫角。倚欄

斜日照青松。會須乘醉攜嘉客。踏雪來看羣玉峯。

送張生

一別相逢十七春。顏顏衰髮互相詢。江湖我再爲遷客。道路君猶困旅人。老驥骨奇心尙壯。青松歲久色

逾新。山城寂寞難爲禮。一作客濁酒無辭舉爵頻。

田家

綠桑高下映平川。賽罷田神笑語喧。林外鳴鳩春雨歇。屋頭初日杏花繁。

別滁

花光濃爛柳輕明。酌酒花前送我行。我亦且一作如常日醉。莫教絃管作離聲。

答謝判官獨遊幽谷見寄

聞道西亭偶獨登。悵然懷我未忘情。新花自向遊人笑。啼鳥猶爲舊日聲。因拂醉題詩句在。應憐手種樹陰成。須知別後無由到。莫厭頻攜野客行。

招許主客

欲將何物招嘉客。惟有新秋一味涼。更一作靜掃廣庭寬一作開百畝。少容明月放一作吐清光。樓頭破鑑看將滿。甕面浮蛆撥已香。仍一作更約多爲詩準備。共防梅老敵難當。

金鳳花

憶繞朱欄手一作喜。自栽綠一作繁。叢高下幾番開。中庭雨過無人迹。狼籍深紅點綠苔。

鷺鷥

風格孤高塵外物。性情閑暇水邊身。盡日獨行溪淺處。青苔白石見纖鱗。

野鶻

鮮鮮毛羽耀朝輝。紅粉牆頭綠樹枝。日暖風輕言語軟。應將喜報主人知。

木芙蓉

種處雪消春始動。開時霜落鴈初過。誰栽金菊叢相近。織出新番蜀錦窠。

樵者

雲際依依認舊林。斷崖荒磴路難尋。西山望見朝來雨。南澗歸時渡處深。

詠雪

至日陽初復。豐年瑞遽臻。飄飄初未積。散漫忽無垠。萬木青煙滅。千門白晝新。往來衝更合。高下著何勻。
望好登長榭。平堪走盡輪。馬寒毛縮蝟。弓勁力添鈞。客醉看成眩。兒嬌一作且。嚙虛堂明永夜。高閣照
清晨。樹石詩翁對。川原獵騎陳。凍狐迷舊穴。飢一作雀噪空囷。此土偏宜稼。而予濫長人。應須待和暖。載
酒共行春。

送楊先輩登第還家

解榻方欣待雋英。掛帆千里忽南征。錦衣白日還家樂。鶴髮高堂獻壽榮。殘雪楚天寒料峭。春風淮水浪
嶢嶢。知君歸意先飛鳥。莫惜停舟酒屢傾。一作錢行。

初至潁州西湖一作到潁治事之種瑞蓮黃楊一作因與郡官小酌其上聊書所見寄淮南轉運呂度支發運許主
客

平湖十頃碧琉璃。四面清陰乍合時。柳絮已將春去遠。海棠應恨我來遲。一作禽似與遊人語。明一本好。

月闌撐野小。一作艇隨。每到最佳堪樂處。卻思君共把芳卮。

三橋詩

皇祐元年新作三橋而名之。既而又爲之詩。

朱欄明綠水。古柳照斜陽。何處偏宜望。清漣對女郎。清漣。閩名。後改作去思堂。

右宜遠

鳴騶入遠樹。飛蓋渡長橋。水闊鷺雙起。波明魚自跳。

右飛蓋

輕舟轉孤嶼。幽浦漾平波。回看望佳處。歸路逐漁歌。

右望佳

答通判呂太博

千頃芙蓉蓋水平。郡伯荷花。四望極目。揚州太守舊多情。畫盆圍處花光合。予嘗採蓮千朵。插以畫盆。圍繞坐席。紅袖傳來酒令行。又

命坐客傳花人摘一葉。舞踏落暉留醉客。歌遲檀板換新聲。如今寂寞西湖上。雨後無人看落英。

祈雨曉過湖上

清晨驅馬思悠然。渺渺平湖碧玉田。曉日未昇先起霧。綠陰一本作雲初合自生煙。身閑始覺時光好。春去猶

餘物色妍。更待四郊甘雨足。相隨簫鼓樂豐年。

熙寧五年秋七月男發等編定

紹熙二年三月郡人孫謙益校正

此卷答蘇子美見寄云祭鬼聚喧囂。本注夷陵俗好祠祭。每遇祠時。里民數百。共餽其餘。里俗謂之祭鬼。諸本皆同。惟蜀本以祭爲擦。朝佐按類篇。擦。初葛切。挑取也。推也。有推食之義。蜀去峽近。故能知其方言。又吉州羅寺丞家京師舊本。亦作擦。按集韻。擦。桑葛切。散之也。有散福之義。二義皆通。今改作擦。一作擦。若作祭字。別無意義。本注豈應復言里俗謂之祭鬼也。

【答蘇子美】俚歌石本作擦鬼擦石本作祭注

【遊東山寺】冬後石本作幕府幕一作幕下

【龍興寺小飲】氛氳氳一作氳

【手植楠木】滋轉石本作

【獨遊東山寺】交加交一作交

【夷陵書事】向君羞君一作君

【寄子山待制】京本作今日報鎮陽守有行日某不

【送沈待制】方喜一作方務

【入汴河聞鴈】新來一作秋

【送劉都官】都城一作門

【幽谷種花】淺深紅白一作深紅淺白

【送楊先輩】高堂一作高年

【答呂太博詩注】插以一作插之

卷十二

律詩五十六首

送一作寄謝中舍二首

滁南一作陽幽谷抱山斜。我鑿清泉水種花。故事已傳遺一作留。老說世人今一作分。作畫圖誇金闥。引籍子

方壯。白髮盈簪我可嗟。試問弦歌爲縣政。一作意何如鱗俎樂無涯。

喜聞嘉譽藹淮壖。又看吳一作送帆解畫船。隴畝遺民談舊政。江山餘思入新篇。人生白首一作傷白髮。吾今爾

仕路一作宦。青雲子勉旃。舉棹南風吹酒醒。離觴莫惜少一作更留連。

酬張器判官泛溪

園林初夏有清香。人意閑吟味愈長。日暖魚跳波面靜。風輕鳥語樹陰涼。野亭飛蓋臨芳草。曲渚迴舟帶夕陽。所得平時爲郡樂。况多嘉客共銜觴。

西園石榴盛開

荒臺野徑共躋攀。正見榴花出短垣。綠葉晚鶯啼處密。紅房初日照時繁。最憐夏景鋪珍簾。尤愛晴香入睡軒。乘興便當攜酒去。不須旌騎擁車轅。

西湖戲作示同遊者

一作初泛西湖

菡萏香清一作綠菱紅蓮。畫舸浮。使君寧一作不。復憶揚州。都將二十四橋月。換得西湖十頃秋。

夢中作

夜涼吹笛千山月。路暗迷人百種花。棋罷不知人換世。酒闌無奈客思家。

秀才歐世英惠然見訪於其還也聊以贈之

相逢十年舊。暫喜一罇同。昔日青衫令。今爲白髮翁。俟時君子守。一作處求士有司公。況子之才美。焉能久困窮。

送楊君之任永康

劍峯雲棧未嘗行。圖畫曾看已可驚。險若登天懸鳥道。下臨無地瀉江聲。折腰莫以微官恥。爲政須通異

俗情況子多才兼美行。薦章期卽達承明。

紀德陳情上致政太傅杜相公二首一云與丞相太傅杜公唱和一十二首自此而下

儉節清名世絕倫。坐令風俗可還淳。貌先年老因憂國。事與心違始乞身。四海儀刑瞻舊德。一罇談笑作閑人。鈴齋幸得親師席。東向時容問治民。

事國一心勤一作且。瘁還家五福壽而康。風波已出憑忠信。松柏難凋耐雪霜。昔日青衫遇知己。今來白首再升堂。里門每入從千騎。賓主俱榮道路光。

太傅杜相公案聚星堂詩謹成一本云太傅相公寵答佳篇仍案批詩副本謹吟成四韻以敘鄙懷。楚肆固知難銜玉。丘門安敢輒論詩。藏之十襲真無用。報以雙金豈所一作宜。已恨語言多猥冗。況因歪

杓一作酌。正淋漓願投几格資。哈噓欲展須於欲睡時。和太傅杜相公寵示之作一本屢賜嘉篇突借謹依元韻聊述媿佩之意

平生孤拙荷公知。敢向公前自銜詩。憂患飄流誠已甚。文辭衰落固其宜。非高僅比巴音下。少味還同魯酒漓。兩辱嘉篇永爲寶。豈惟榮耀詫當時。

太傅杜相公有答兗州待制之句其卒章云獨無風雅可流傳。因輒成一本作因成四韻。南都已見成新集。東魯休嗟未作詩。霖雨曾爲天下福。甘棠何止郡人思。元劉事業時無取。姚宋篇章世

不知二美惟公所兼有。後生何者欲攀追。

依韻答杜相公寵示之作

一本云伏蒙寵示佳篇以不赴東園之會某亦經春多病誠有可嘆謹依元韻輒紆鄙素一本於經春多病下文有略無少暇四字

醉翁豐樂一閑身。憔悴今來汴水濱。每聽鳥聲知改節。因吹柳絮惜殘春。蓋經春罕見花也平生未省降詩敵。近和難韻甚覺率彊到處何嘗訴酒巡。壯志銷磨都已盡。看花鬪作飲茶人。

依韻和杜相公喜雨之什

歲時豐儉若循環。天幸非由一作因拙政然。一雨雖知為美澤。三登猶未一作未足補凶年。京東累歲不熟桑陰蔽日交

垂路。麥穗合風秀滿田。千里郊原想如畫。正宜攜酒望晴川。

謝太傅杜相公寵示嘉篇

凜凜節奇霜潤柏。昭昭心瑩玉壺冰。正身尚可清風俗。當暑何須厭鬱蒸。塵柄屢揮容一作會請益。龍門雖峻忝先登。立朝行已師資久。寧止篇章此服膺。

答杜相公寵示去思堂詩

當年丞相倦洪鈞。弭節初來潁水濱。惟以琴樽樂嘉客。能將富貴比浮雲。西溪水色春長綠。北渚花光暖一作自薰。去思堂在北渚之北臨西溪溪晏公所開也得載公詩播人口。去思從此四夷聞。

答太傅相公見贈長韻

蹤跡本羈單。登門二十年。平生任愚拙。自進恥因緣。憂患經多矣。疲驚尙勉旃。凋零鷺谷友。脩與尹師魯蘇子美同出
下。憔悴鴈池邊。忽忽良時失。區區俗慮闡。公齋每偷暇。師席屢攻堅。善誨常一本無倦。餘談亦可編。每接
講皆立朝行之節。至於談笑之間。亦多記朝廷故事。皆可紀錄。以貽後生。

肯逐利名遷。

仰高雖莫及。希驥豈非賢。報國如乖願。歸耕寧買田。期無辱知己。

借觀五老詩次韻爲謝

一本注云。卽丞相杜公太子賓客王渙光。祿卿畢世長兵部郎中朱貫尙書郎馮平。

脫遺軒冕就安閑。笑傲丘園縱倒冠。白髮憂民雖種種。丹心許國尙桓桓。鴻冥待路高難慕。松老無風韻

自寒。聞說優游多唱和。新篇何惜盡爲傳。一作畫圖。看。

答杜相公惠詩

一本云。近以藥苗茶具爲獻。伏蒙報以嘉篇云云。謹於別韻課成一首。

藥苗本是山仙。一作家味茶具偏於野客宜。敢以微誠將薄物。少資清興入新詩。言無俗韻精而勁。筆有神

鋒老更奇。二寶收藏傳百在。一作世豈惟榮耀詫當時。

去思堂手植雙柳今已成。陰因而有感。

曲欄高柳拂層簷。却憶初栽映碧潭。人昔共遊今孰在。樹猶如此我何堪。壯心無復身從老。世事都銷酒
半酣。後日更來知有幾。攀條莫惜駐征驂。

和陸子履再遊城西李園

歐陽文忠公集 二 律詩

京師花木類多奇，常恨春歸人不歸。
車馬喧喧走塵土，園林處處鎖芳菲。
殘紅已落香猶在，羈客多傷涕自揮。
我亦悠然無事者，約君聯騎訪郊圻。

內直對月寄子華舍人持國廷評一作呈原父

禁署一作香沉沉玉漏傳，月華雲表溢金盤。
纖埃不隔光初滿，萬物無聲夜向闌。
蓮燭燒殘愁夢斷，蕙爐熏

歌覺衣單。水精宮鎖黃金闕，故比人間分外寒。

答子華舍人退朝小飲官舍一作和子華朝退寒甚陪諸公飲

玉階朝罷卷晨班，官舍相留一笑間。
與世漸疎嗟已老，一作綠老得朋為樂偶偷閑。
紅牋擲管吟紅藥，綠酒盈罇舞綠鬟。
自是風情年少事，多慚白髮與蒼顏。

內直晨出便赴奉慈齋宮一作宿馬上口占一本云呈子華子履

凌晨更直九門開，驅馬悠悠望禁街。
霜後樓臺明曉日，天寒煙霧著宮樓。
山林未去猶貪寵，罇酒何時共

放懷。已覺蕭條悲晚歲，更憐衰病怯清齋。

景靈朝謁從駕還宮

琳館清晨藹瑞氛，玉旒朝罷奏韶鈞。
綠槐夾路飛黃蓋，翠輦鳴鞘向一作入紫宸。
金闕日高猶泣露，綵旗風

細不驚塵。自慚白首追時彥，行近儲胥忝侍臣。

憶滁州幽谷

滁南一作山幽谷抱千峯。高下山花遠近紅。當日辛勤皆手植。而今開落任春風。主人不覺悲華髮。野老猶

能說醉翁。誰與援琴親寫取。夜泉聲在翠微中。

和韓學士襄州聞喜亭置酒一作和欽聖學士聞喜置酒即事

巖辭高城漢水邊。登臨誰與共躋攀。清川萬古流不盡。白鳥雙飛意自閑。可笑沉碑憂岸谷。誰能把酒對江山。少年我亦曾遊目。風物今思一夢還。

寄題梅龍圖滑州溪園一作西溪

聞說溪園景漸佳。遙知清興已無涯。飲闌歸騎多一作去。乘月雪後尋春自探花。百疇黃鸝消永日。雙飛白鳥避鳴笳。平生喜接君酬一作嗟予。每許陪高唱。不得罇前詠落霞。

奉使道中五言長韻

初旭一作日。瑞霞烘都門。祖帳供親持。使者節。曉出大明宮。城闕青煙起。樓臺白霧中。繡鞵一作鞍。驕躍。貂袖紫蒙蒙。朔野驚颯慘。邊城畫角雄。過橋分水。回首羨南鴻。地里山川隔。天文日月同。兒童能走馬。婦女亦腰弓。度險行愁失。盤高路欲窮。一作斗絕誇天險。高盤畏路窮。山深聞喚鹿。林黑自生風。松壑寒逾響。冰溪一作深。咽復通。望平愁驛迥。野曠覺天穹。駿足來山北。輕禽出海東。合圍飛走盡。移帳水泉空。講信鄰方睦。尊

賢禮亦隆。一作研。冰燒酒赤。一作凍。膾縷霜紅。白草經春在。黃沙盡日濛。新年風漸變。歸路雪初融。祇事須彊力。嗟予乃病翁。深慚漢蘇武。歸國不論功。

奉使契丹初至雄州一作過塞

古關衰柳聚寒鷗。駐馬城頭日欲斜。一作駐馬關頭見落霞。猶去西樓二千里。行人到此莫思家。

奉使契丹回出上京馬上作

紫貂裘暖朔風驚。潢水冰光射日明。笑語同來向公子。馬頭今日向南行。

送渭州王龍圖

漢軍一作兵十萬控山河。玉帳優游暇日多。夷狄從來懷信義。廟堂今不用干戈。吟餘畫角吹殘月。醉裏紅

燈炫綺羅。此樂直須年少壯。嗟余心志已蹉跎。

李留後家聞箏坐上作全少時嘗聞一鈞容老樂工箏聲與時人所彈絕異。是前朝教坊舊聲。其後不復聞至此始復一聞也。

不聽哀箏二十年。忽逢纖指弄鳴絃。絳蠻巧囀花間舌。嗚咽交流冰下泉。常謂此聲今已絕。問渠從小自誰傳。樽前笑我聞彈罷。白髮蕭然涕泫然。

送鄆州李留後

北州遺頌藹嘉聲。東土還聞政有成。組甲光寒圍夜帳。綵旗風暖看春耕。金釵墜鬢分行立。玉麈高談四

坐傾富貴常情誰不羨。愛君風韻有餘清。

子華學士傑直未滿遽出館伴病夫遂當輪宿輒成拙句奉呈

萬釘寶帶爛腰鑲。賜一作錫宴新陪一笑歡。金馬並遊年最少。玉堂初直夜猶寒。自嗟零一作流落凋顏鬢。晚

得飛翔接羽翰。今日遽聞催遞宿。不容多病養衰殘。

禮部貢院閣進士就試自此而下二十首皆禮部貢院唱和。一本云凡二十二首蓋二首見外集。

紫案焚香暖吹輕。廣庭清曉席羣英。無譁戰士銜枚勇。下筆春蠶食葉聲。鄉里獻賢先德行。朝廷列爵待

公卿。自慙衰病心神耗。賴有羣公鑒裁一作擇精。

和梅聖俞元夕登東樓

遊豫恩同萬國權。新年佳節候初還。華燈燦燦春風裏。黃傘亭亭瑞霧間。可愛清光澄夜色。遙知喜氣動

天顏。自憐曾預一作與稱觴列。獨宿冰廳夢帝關。

再和

禁城車馬夜喧喧。閑繞危欄一作樓去復還。遙望觚稜煙靄外。似聞天樂夢魂間。豈無罇酒當佳節。況有朋

歡慰病顏。待得歸時花在否。春禽簷際已關關。

又和

憑高寓目偶乘閑。衫服遊人見往還。明月正臨雙闕上。行歌遙聽九衢間。黃金絡束一作馬追朱憶。紅燭籠紗照玉顏。與世漸已一作疎。嗟老矣。佳辰樂事豈相關。

憶鶴呈公儀一作和公儀憶鶴

一笑相驩一作從樂得朋。誦君雙鶴句尤清。高懷自喜凌雲格。俗耳誰思警露聲。所好與時雖異趣。累心於物豈非情。歸休約我攜琴去。共看婆娑舞月明。

答王禹玉見贈一作和禹玉書事

昔時叨入武成宮。曾看揮毫氣吐虹。夢寐閑思十年舊一作事笑談今此一罇同。喜君新賜黃金帶。願我宜為白髮翁。自古薦賢為報國。幸依精識士稱公。

答王內翰范舍人一本云敘懷謝景仁禹玉

相從一笑歡無厭。屢獲新篇喜可涯。自昔居前誚穠稂。幸容相倚媿蒹葭。白麻詔令追三代一本注禹玉年前方入翰青史文章自一家一本注景仁修撰又同書局我亦諫垣新忝命。君恩未報髮先華禹玉新除學士景仁新除修撰

戲答聖俞持燭之句

辱君贈我言雖厚。聽我酬君意不同。病眼自憎紅蠟燭。何人肯伴白鬚翁。花時浪過如春夢。酒敵先甘伏下風。惟有吟哦殊不倦。始知文字樂無窮。

小桃一作和公儀正月桃

雪裏花開人未知。摘來相顧共驚疑。便當索酒花前醉。初見今年第一枝。

戲書

支離多病歎衰顏。賴得一作有羣居一笑歡。人老思家甚年少。身閑泥酒過春寒。來時御柳一作水天街凍。

去梨花禁籬殘。縱使開門佳節晚。未妨雙鶴舞霜翰。一作朝鎖漢臺空恨望欲將春恨託飛翰

春雪一本上和有聖俞字

逗曉一作月風聲惡。褰簾雪勢斜。應憐未歸客。故勒欲開花。病思寒添睡。春愁夢在家。誰能慰寂寞。惟有酒

如霞。

和梅公儀嘗茶

溪山擊鼓助雷驚。逗曉靈芽發翠莖。摘處兩旗香可愛。買來雙鳳品尤精。寒侵病骨惟思睡。花落春愁未

解醒。喜共紫甌吟且酌。羨君蕭洒有餘清。

和較藝書事一作奉答禹玉再示之作

相隨懷詔下天闈。一鎖南宮隔幾旬。玉塵清談消永日。金罇美酒惜餘春。杯盤餽粥春風冷。池館榆錢夜

雨新。猶是人間好時節。歸休過我莫辭頻。

歐陽文忠公集 二 律詩

九十三

和戲答公儀贈白鷗一本無白字

梅公憐我髭如雪。贈以雙鷗一作鷗。意有云。但見尋常思白兔。便疑不解醉紅裙。吟齋雖喜留閑客。野性寧忘在嶺雲。我有銅臺方尺瓦。慙非玉案欲酬君。

再和用其韻一作依韻

佳醖能令百事忘。豈惟閑伴倒餘缸。珍奇來自海千里。皎潔明如璧一雙。日暖朝籠青石砌。春寒夜宿碧紗窗。蠻煙瘴霧雖生處。何必區區憶陋邦。

和聖俞春雨

簷瓦蕭蕭雨勢疎。寂寥官舍與君俱。身遭鎖閉如鸚鵡。病識陰晴似鶉鴒。年少自愁花爛熳。春寒偏著老肌膚。莫嫌來往傳詩句。不爾須當泥酒壺。

出省有日書事

凌晨小雨壓塵輕。閑憶登高望禁城。樹色連雲春泱莽。風光著草日晴明。看榆吐莢驚將落。見鶉移巢忽已成。誰向兒童報歸日。爲翁寒食少一作且留飴。

和一本有馬玉字較藝將畢

槐柳來時綠未勻。開門節物一番新。踏青寒食追遊騎。賜火清明忝侍臣。拂面蜘蛛占喜事。入簾蝴蝶報

家人在李賀詩莫瞋年少思歸切。白髮衰翁尙惜春。

喜定號和禹玉內翰用其韻一作和禹玉喜定號

衡鑿慙叨選。英豪此所鍾。古今參雅鄭。善惡雜臯共。揮翰飄飄思。懷奇落落胸。披文驚可畏。奏下始開封。

但喜真才得。寧一作何虞橫議攻。欲知儒學盛。首善本三廳。

和出省國朝之制禮部考定卷子奏上字號差臺官一人拆封出榜一作和公儀上馬有作

僮奴一作奴僕被莫相催。待報霜臺御史來。晴陌便當聯騎去。春風任放百花開。文章紙貴爭一作看馳譽。朝

野人言慶得才。共向丹墀侍一作待。臨選莫驚鱗鬣化風雷。

熙寧五年秋七月男發等編定

紹熙二年三月郡人孫謙益校正

紀德陳情上致政太傅杜相公二首京本作某啓謹吟成紀德陳情拙詩二章拜獻太傅相公雖不足游揚大君子之盛美亦聊伸門下小子區區感遇之心于冒台殿伏惟

附賜采覽

太傅杜相公索聚星堂詩謹成京本作某啓伏蒙太傅相公寵答佳篇仍索

和太傅杜相公寵示之作京本作某啓伏蒙累賜嘉篇過形褒借在於庸拙何以當之謹依元韻課成一首聊述媿佩之意

依韻答杜相公寵示之作京本作某啓伏蒙寵示佳篇以不赴東園之會爲恨某亦經春多病略無少暇誠有可嗟謹依元韻輒紆鄙素

依韻和杜相公喜雨之什京本作某啓伏蒙太傅相公寵示喜雨之什過形獎誘感愧何勝謹依元韻奉和少伸鄙悰

謝太傅杜相公寵示嘉篇京本作某啓伏蒙寵示嘉篇謹課成七言四韻以敘謝

答杜相公寵示去思堂詩京本作某啓伏蒙寵示去思堂詩曲有褒揚形于雅韻有以見大君子樂善之心而小子蒙幸之厚也謹課七言四韻叙謝

答太傅相公見贈長韻京本作某啓伏蒙寵示長韻過褒後學其為榮幸何可勝言輒述鄙懷聊敘感概隨高韻文不盡誠仰浼台慈實深媿懼

答杜相公惠詩京本作某啓近以藥苗茶具為獻伏蒙報以嘉篇而清韻孤高無容攀企率強累日終不能成智力俱疲不知自止謹於別韻課成一首伏惟采覽

右詩序定本雖從簡然公舊語不可不存

【酬張判官】泛溪一作示泛溪之什

【贈歐世英】之才美一作才美

【手植雙柳】從老一作徒

【憶幽谷】寫取一作去

【和韓學士】誰能一作惟當

【題滑州溪園】遙知一作發君

【奉使道中】地里一作理

【又和梅聖俞元夕登東樓】朱憶朱一作珠

【和出省】聯騎一作連騎

卷十三

律詩五十五首

送鄭革先輩賜第南歸一本注革以累舉年老恩賜出身

少年鄉譽歎才淹，六十猶隨貢士函。
握手親朋驚白髮，還家閭里看青衫。
閣涵空翠連衡阜，門枕寒江落楚帆。
試問塵埃勤斗祿，何如琴酒老雲巖。

和原父揚州六題六一作五

時會堂三首遺貢茶所也

積雪猶封蒙頂樹，驚雷未發建溪春。
中州地暖萌芽早，入貢宜先百物新。

憶昔嘗修守臣職，余嘗守揚州歲貢新茶先春自探兩旗開。
誰知白首來辭禁，得與金鑿賜一杯。

自東門泛舟至竹西亭登崑丘入蒙谷戲題春貢亭

崑丘蒙谷接新亭，畫舸悠悠春水生。
欲覓揚州使君處，但隨風際管絃聲。

竹西亭

十里樓臺歌吹繁。揚州無復似當年。古來興廢皆如此。徒使登臨一慨然。

崑丘臺

訪古高臺半已傾。春郊誰一作從綵旗行。喜聞車馬人同樂。慣聽笙歌鳥不驚。

蒙谷

一徑崎嶇入谷中。翠條紅刺骨春叢。花深時有人相應。竹密初疑路不通。

內直奉寄聖俞博士

千門鑰一作入斷人聲。樓閣一本沉沉夜氣生。獨直偏知宮漏永。稍寒尤一作覺玉堂清。霜雲映月鱗鱗色。風葉飛空撼撼鳴。犬馬力疲恩未報。坐驚時節已崢嶸。

送梅龍圖公儀知杭州

萬室東南富且一作號。繁羨君風力有餘。閑漁樵人樂江湖外。一作談笑詩成罇俎間。日暖梨花催美酒。天寒桂子落空山。郵筒不絕如飛翼。一作雖然不一作莫惜新篇屢往還。一作應有新一作得陪佳賞一作篇慰病顏。

送沈學士知常州

舊館芸香鎖寂寥。齋舲東下入秋濤。江晴風暖旌旗颺。木落霜清鼓角高。吟就綵牋賓已醉。舞翻紅袖飲方豪。平生粗得爲州樂。因羨君行首重搔。

聖俞在南省監印進士試卷有兀然獨坐之歎因思去歲同在禮闈慨然有感兼簡子華景仁

南宮官舍苦蕭條。常憶羣居接雋寮。古屋醉吟燈豔豔。畫廊愁聽雨蕭蕭。殘春共約無虛擲。一歲那知忽復銷。顧我心情又非昨。祇思相伴老漁樵。

奉答聖俞歲日書事

積雪照清晨。東風冷著人。一作隨年光向老。速物意逐時新。貫酒閑邀客。披裘共一作自探春。猶能自一作略勉。願我莫辭頻。

夜聞春風有感奉寄同院子華紫微長文景仁

閨後春深雪始銷。東風凌鑠勢方豪。陽生草木黃泉動。冰破江湖白浪高。未報國恩嗟病骨。可怜身事一漁舠。少年自與芳菲競。莫笑衰翁擁弊袍。

病告中懷子華原父

狂來有意與春爭。老去心情漸不能。世味惟存詩淡泊。生涯半爲病侵陵。花明曉日繁如錦。酒撥浮醅綠似澗。自是少年豪橫過。而今癡鈍若寒蠅。

奉酬長文舍人出城見示之句

春分臘雪未全銷。凜冽春寒氣尚驕。攝事初欣迎社鷺。尋芳因得過溪橋。清浮酒蟻醅初撥。暖入鸞篋舌

漸調興味愛君年尚少。莫嫌齋禁一作齋館暫無饜。

唐崇徽公主手痕和韓內翰

故鄉飛鳥尚啁啾。何況悲笳出塞愁。青塚埋魂知不返。翠崖遺迹爲誰留。玉顏自古爲身累。肉食何人與國謀。行路至今空歎息。巖花澗草自春秋。

答和閣老劉舍人雨中見寄

花間鳥語愁泥滑。屋上鳩鳴厭雨多。坐見殘芳一作芳春一如此。可憐吾意已蹉跎。蕭條兩鬢霜餘草。澌澌十分金卷荷。此物猶能慰衰老。一作病稍晴相約屢相過。

寄閣老劉舍人

夢寐江西未得歸。誰憐蕭颯鬢毛衰。莓苔生壁圖書室。風雨閉門桃李時。得酒雖能陪笑語。老年其實厭追隨。明朝雨止花應在。又踏春泥向鳳池。

詳定幕次呈同舍嘉祐四年御試進士時詳定卷子幕次在崇政殿後

來時宮柳綠初勻。坐見紅芳幾番新。蜂蜜滿房花結子。還家何處覓殘春。

禁中見鞞紅牡丹洛中花之奇者也

盛遊西洛方年少。晚落南譙號醉翁。白首歸來玉堂署。一作上君王殿後見鞞紅。

和江鄰幾學士桃花用其韻時在崇政殿後詳定幕次

草上紅多枝上稀。芳條一作綠萼憶來時。見桃著子始歸後。誰道仙花開落遲。

送襄陵令李君

綠髮襄陵新長官。面顏雖老渥如丹。君服何首烏。鬚髮皆黑。顏容如少時。折腰聊爲五斗屈。把酒猶能一笑歡。紅棗林繁欣歲熟。紫檀皮軟禦春寒。民淳政簡居多樂。無苦思歸欲掛冠。

景靈宮致齋

攝事衰年力不彊。誰憐岑寂臥齋坊。一作房。青苔點點無人迹。綠葉陰陰覆砌涼。玉宇清風來處遠。仙家白日靜中長。卻視九衢車馬客。自然顏鬢易蒼蒼。

夏享太廟攝事齋宮聞鶯寄原甫

四月田家麥穗稠。桑枝生椹鳥啾啾。鳳城綠樹知多少。何處飛來黃栗留。田家謂麥熟時鳴者。爲黃栗留出詩義。

送王平甫下第安國

歸袂搖搖心浩然。曉船鳴鼓轉風灘。朝廷失士有司恥。貧賤不憂君子難。執手聊須爲醉酒。一作別。還家何以慰親權。自慚知子不一作未。能薦。白首胡爲侍從官。

對雪十韻

對雪無佳句。端居正杜門。人閑見初初一作見落。風定不勝繁。可喜輕明質。都無剪刻痕。鋪平失池沼。飄急響窗軒。惜不搖嘉樹。衝宜走畫轅。寒欺白酒嫩。暖一作考愛紫貂溫。遠靄銷如洗。愁雲晚更屯。兒吟鵲鳳語。翁坐凍鴟蹲。病思驚殘歲。朋歡賴酒一作樽。稍晴春意動。誰與探名園。

和武平學士歲晚禁直書懷五言二十韻用其韻

多病淹殘歲。初寒臥直廬。朝廷務清靜。鈴索少文書。嚮學今爲盛。優賢古莫如。覲深嚴禁署。一作闕閑宴樂羣居。賜馬聯金絡。清塵侍玉輿。討論三代盛。獻納萬機餘。號令存寬大。文章復古初。笑談揮翰墨。俄頃列瓊瑤。夜漏銷宮燭。春暉上玉除。譎詩唐李杜。言語漢嚴徐。自顧追時彥。多慚不鄙予。無鹽煩刻畫。寒谷借吹噓。朋友飛誰鷺。君臣在藻魚。貧榮同衛鶴。取笑類黔驢。皎皎心雖在。蕭蕭髮已疎。未知論報效。安得遂樵漁。雲破西山出。江橫畫閣虛。餘生歎勞止。搔首念歸歟。引綬誇民吏。椎牛會里閭。一麾終得請。此計豈躊躇。

答西京王尚書寄牡丹

新花來遠喜。開封呼酒看。花興未窮年。少曾爲洛陽客。眼明重見魏家紅。卻思初赴青油幕。自笑今爲白髮翁。西望無由陪勝賞。但吟佳句想芳叢。

應制賞花釣魚

絳闕晨霞一作光照霧開。輕塵不動翠華來。魚遊碧沼涵靈德。花馥清香薦壽杯。夢聽鈞天聲杳默。日長化國景徘徊。自慚擊壤音多野。帝所賡歌亦許陪。

清明賜新火

魚鑰侵晨放九門。天街一騎走紅塵。桐華應候催佳節。榆火推恩忝侍臣。多病正愁錫粥冷。清香但愛蠟煙新。自憐慣識金蓮燭。翰苑曾經七見春。

明堂慶成

辰火天文次。皐門路寢闕。奉親昭孝德。惟帝饗精誠。禮以三年講。時因萬物成。九筵嚴太室。六變導和聲。象魏中天起。風雷大號行。歡呼響山岳。流澤浹根莖。寶墨飛雲動。金文耀日晶。從臣才力薄。無以頌休明。

羣玉殿賜宴一本作謝上賜飛白書

至治臻無事。豐年樂有成。圖書開祕府。宴飫一作飲集羣英。論道皇墳奧。貽謀一作謨寶訓明。九重多暇豫。八體極研精。筆力千鈞勁。豪端萬象生。飛牋金灑落。拜賜玉鏘鳴。盛際崇儒學。愚臣濫寵榮。惟能同舞獸。聞樂識和聲。

永昭陵挽詞三首仁宗

與子雖天意。知人昔帝難。一言謀早定。九鼎勢先安。大舜仁由性。成湯治以寬。孤臣恩未報。清血但洑瀾。

干戈不用臻無事。朝野多歡樂有年。便坐看揮飛白筆。侍臣新和柏梁篇。衣冠忽見藏原廟。簫一作鼓瑟聞洛川。寂寞秋風羣玉殿。還同恍惚夢鈞天。

行殿沉沉畫翠重。淒涼挽鐸出深宮。攀號不悟龍胡遠。侍從猶穿豹尾中。日薄山川長起霧。天寒松柏自生風。斯民四十年涵煦。耕鑿安知荷帝功。

續作永昭陵挽詞五首

王者居尊本無外。由來天下以爲家。六龍白日乘雲去。何用金錢買道車。苦霧霏霏著彩旗。猶排吉仗雜凶儀。常時鳳輦行遊處。今日龍輻慟哭隨。都人擾擾塞康莊。西送靈車過苑牆。金鼎藥成龍已去。人間惟有鼠拖腸。素幕悠悠逗曉風。行隨哀挽出深宮。妃嬪莫向蒼梧望。雲覆昭陵洛水東。叨陪法從最多年。慣聽梨園奏管絃。從此無因瞻黼坐。惟應魂夢到鈞天。

赴集禧宮祈雪追憶從先皇駕幸泫然有感

琳闕岩岩倚瑞煙。憶陪遊豫入新年。雲深曉日開宮殿。水闊春風颺管絃。千騎清塵回輦路。萬家明月放燈天。一朝人事淒涼改。惟有靈光獨巋然。

夜宿中書東閣

翰林平日接羣公。文酒相歡慰病翁。白首歸田徒鑿蹟有約。黃扉論道愧無功。攀髯路斷三山遠。憂國心危百箭攻。今夜靜聽丹禁漏。尙疑身在玉堂中。

送王學士赴兩浙轉運

京本作送王勝之兩浙運使。

漢家財利析秋毫。暫屈清才豈足勞。邑屋連雲盈萬井。舳艫銜尾列千艘。春寒欲盡黃梅雨。海浪高翻白鷺濤。平昔壯心今在否。江山猶得助詩豪。

早朝

闔闔初開瑞霧中。丹霞曉日上蒼龍。鳴鞭響徹廊千步。佩玉聲趨戟百重。雪後朝寒猶凜冽。柳梢春意已丰茸。少年自結芳菲侶。老病惟添睡思濃。

下直

宮柳街槐綠未齊。春陰不解宿雲低。輕寒漠漠侵臄褐。小雨班班作燕泥。報國無功嗟已老。歸田有約一作計一何稽。終當自駕柴車去。獨結茅蘆潁水西。

齋宮尙有殘雪思。作學士時攝事於此嘗有聞鶯詩寄原父因而有感四首

雪壓枯條脈未抽。春寒慘慄作春愁。卻思綠葉清陰下。來此曾聞黃栗留。老來何與青春事。閑處方知白日長。自恨乞身今未得。齒牙浮動鬢蒼浪。

兩京平日接英髦。不獨詩豪酒亦豪。休把青銅照雙鬢。君謨今已白刁騷。
詩篇自覺隨年老。酒力猶能助氣豪。興味不衰惟此爾。其餘萬事一牛毛。

攝事齋宮偶書一作齋感事

齋宮岑寂偶偷閑。猶覺閑中興未闌。美酒清香銷晝景。冷風殘雪作春寒。丹心未死惟憂國。白髮盈簪豈掛冠。誰爲寄聲清潁客。此生終不負漁竿。

早朝感事

疎星牢落曉光微。殘月蒼龍闕角西。玉勒爭門隨仗入。牙牌當殿報班齊。羽儀雖接鴛兼鷺。野性終存鹿與麕。笑煞汝陰常處士。墨蹟作雲林高臥客。十年騎馬聽朝鷄。

集禧謝雨

十里長街五鼓催。泥深雨急馬行遲。臥聽竹屋蕭蕭響。卻憶滁州睡足時。

下直呈同行三公

午漏聲初轉。歸鞍路偶同。天清黃道日。街闊綠槐風。萬國舟車會。中天象魏雄。戢戈清四海。論道屬三公。自愧陪羣彥。從來但樸忠。時平容竊祿。歲晚歎衰翁。買地淮山北。垂竿潁水東。稻粱雖可戀。吾志在冥鴻。

東閣雨中

直閣時偷暇。幽懷坐獨哦。綠苔人迹少。黃葉雨聲多。雲結愁陰重。風傳禁漏過。瑤圖新嗣聖。玉塞久包戈。
相府文書簡。豐年氣候和。還將鳳池句。聊雜野人歌。

四月十七日景靈宮奉迎仁宗皇帝御容有感

行殿峨峨出綠槐。琳房芝闕聳_{一作}崔嵬。管絃飄落人間去。幢節疑從天上來。基業百年傳聖子。黔黎四

紀樂春臺。孤臣不得同鍼虎。未死心先冷若灰。

熙寧五年秋七月男發等編定

紹熙二年三月郡人孫謙益校正

【兼簡子華景仁】相伴_{一作相逐}

【奉酬長文出城】鷺_{一作鷺}簞_{一作簞}莫嫌_{一作莫懷}無_{一作無}慘_{一作慘}慄_{一作慄}

【寄劉舍人】笑語_{一作語笑}

【和江鄰幾桃花】歸後_{一作去}

【景靈宮致齋】_{石本序云某啓景靈致齋書事奉懷}官糾察太學史院五君子伏惟采覽_{某上}

【和武平禁直書懷】躊躇_{一作踟蹰}

【早朝感事】_{石本}廢_{一作廢}

卷十四

律詩六十五首

馬上默誦聖俞詩有感一作偶題

興來筆力千鈞勁。一作重酒醒一作醉後。人間萬事空。蘇梅二子今亡矣。索寞滁山一醉一作憫憫翁。

定力院七葉木

伊洛多佳木。娑羅舊得名。常於佛家見。宜在月宮生。鈿砌陰鋪靜。虛堂子落聲。夜風疑雨過。朝露炫霞明。車馬王都盛。樓臺梵宇闕。惟應靜者樂。時聽野禽鳴。

秋陰

秋陰積不散。夜氣凜初清。雨冷侵燈暈。風愁送葉聲。國恩慚未報。歲晚念餘生。卻憶滁州睡。村醪自解醒。

秋懷

節物豈不好。秋懷何黯然。西風酒旗市。細雨菊花天。感事悲雙鬢。包羞一作食榮食萬錢。鹿車終自駕。歸去穎東田。

初寒

多病淹殘歲。初寒悄獨吟。雲容乍濃淡。秋色半晴陰。籬菊催佳節。山泉響夜琴。自能知此樂。何必戀腰金。

寄渭州王仲儀龍圖

一作送王素之渭州

羨君三作臨邊守。慣聽胡笳不慘然。弓勁秋風鳴白角。帳寒春雪壓青氈。威行四境烽煙斷。響入千山號令傳。翠幕紅燈照羅綺。心情何似十年前。

崇政殿試賢良晚歸

槐柳依依禁籞長。初寒人意自淒涼。鳳城斜日留殘照。玉闕浮雲結夜霜。老負漁竿貪國寵。病須樽酒送年光。歸來解帶西風冷。衣袖猶霑玉案香。

聞潁州通判國博與知郡學士唱和頗多。因以奉寄知郡陸經通判楊褒。

一自蘇梅閉九泉。始聞東潁播新篇。金樽留客史一作使君醉。玉麈高談別乘賢。十里秋風紅菡萏。一溪春水碧漪漣。政成事簡何爲樂。終日吟哦雜管絃。

南郊慶成

祀教民昭孝。天惟德是親。太宮嚴大饗。吉士兆精禋。禮樂三王盛。梯航萬國賓。恩霑羣動洽。慶與一陽新。奉册尊長樂。均釐及衆臣。不須雲物瑞。和氣浹人神。

和昭文相公上巳宴

一雨初消九陌塵。乘蘭修楔及芳辰。恩深始錫龍池宴。節正須方。一作知鳳曆新。是歲始頒明天新曆三月三日丁巳紅琥珀傳盃。激灑碧琉璃。瑩水齋淪。上林未放花齊發。留待鳴鞘出紫宸。

三日赴宴口占

賜飲初逢楔節佳。昆池新漲碧無涯。九門寒食多遊騎。三月春陰正養花。共喜流觴修故事。自憐雙鬢惜年華。鳳城殘照歸鞍晚。禁籞無風柳自斜。

讀楊蟠章安一本有集

蘇梅久作黃泉客。我亦今爲白髮翁。臥讀楊蟠一千首。乞渠秋月與春風。

蘇主簿挽歌洵

布衣馳譽入京都。丹旆俄驚一作反舊閭。諸老誰能先賈誼。君王猶未識相如。三年弟子行喪禮。千兩鄉人會葬車。我獨一作空齋掛塵榻。遺編時閱子雲書。

寄題沙溪寶錫碑本院

爲愛江西物物佳。作詩嘗向北人誇。青林霜日換一作楓葉。白水秋風吹稻花。釀酒烹雞留醉客。鳴機織墨蹟作楫。亭徧山家。野僧獨得無生樂。終日焚香坐結跏。

宋司空一作元憲公挽辭

文章天下無雙譽。伯仲人間第一流。出入兩朝推舊德。周旋三事著嘉謀。從容進退身名泰。寵錫哀一作榮禮數優。棠棣從來敦友愛。九原相望接松楸。

感事 治平丁未正月二十有六日

故園三徑久成荒。賢路胡爲此坐妨。病骨瘦便花葉暖。嘉祐八年于闐國王遣使來朝。賈恩賜宰臣已下。于闐所獻花葉布柔細潔白如凝脂。而察風甚溫。不減。先朝舊例。兩時輔臣歲賜龍茶一斤而已。余在仁宗朝。作學士兼史館修撰。嘗煩心渴喜鳳團香。以史院無國史。乞降一本以備檢討。遂命天章閣錄本付院。仁宗因幸天章。見禍也。上以學士校新寫國史。思余上言。亟命賜黃封酒一瓶。果子一盒。鳳團茶一斤。押賜中使語余云。號弓但灑孤臣血。憂國空餘兩鬢霜。何日君恩憫衰朽。許從初服返耕桑。

大行皇帝靈駕發引挽歌辭

享國年雖近。斯民澤已深。儉勤成禹聖。仁孝本虞心。方慶逢千載。俄驚遇八音。天愁嵩嶺外。雲慘洛川潯。仗動千官衛。神行萬象陰。孤臣恩未報。清血但盈襟。

其一

文景孜孜儉與恭。慨然思就太平功。興隆學校皇家盛。放斥嬪嬙永巷空。威懼一作點羌方問罪。丹成仙鼎忽遺弓。霜清日薄簫笳咽。萬國悲號慘澹中。

其二

千齡應運叶天人。四海方欣政日新。忽見九門陳羽衛。猶疑五載欲時巡。觚稜月暗翔金鳳。輦道霜清臥石麟。白首舊臣瞻畫墁。秋風淚灑屬車塵。

其三

奉答子履學士見贈之作

誰言潁水似瀟湘。一笑相逢樂未央。歲晚君尤耐霜雪。興闌吾欲返耕桑。銅槽旋壓清樽美。玉麈閑揮白日長。豫約詩一作書。筒屢來往。兩州雞犬接封疆。

送道州張職方

桂籍青衫憶共遊。憐君華髮始爲州。身行南鴈不到處。山與北人相對愁。莫爲高才輕遠俗。當令遺老識賢侯。三年解組來歸日。吾已先耕潁水頭。

再至汝陰二絕

黃栗留鳴桑葚美。紫櫻桃熟麥風涼。朱輪昔愧無遺愛。白首重來似故鄉。
十載榮華貪國寵。一生憂患損天真。潁人莫怪歸來晚。新向君前乞得身。

水味甘於大明井。魚肥恰似新開湖。十四五年勞夢寐。此時才得少踟蹰。

余時將赴耆社。風許枉道過潁也。

郡齋書事寄子履

使君居處似山中。吏散焚香一室空。雨過紫苔惟鳥迹。夜涼蒼檜起天風。白醪酒嫩迎秋熟。紅棗林繁喜歲豐。寄語瀛洲未歸客。醉翁今已作僊翁。

答子履學士見寄

穎毫相望樂未央。吾州仍得治仙鄉。夢回枕上黃粱熟。身在壺中白日長。每恨老年才已盡。怕逢詩敵力難當。知君欲別西湖去。乞我橋南菡萏香。

寄棗人行書贈子履學士

秋來紅棗壓枝繁。堆向君家白玉盤。甘辛楚國赤萍實。磊落韓嫣黃金丸。聊效詩人投木李。敢期佳句報琅玕。嗟予久苦相如渴。却憶冰梨熨齒寒。

贈隱者

五岳嵩當天地中。閒君仍在最高峯。山藏六月陰崖雪。潭養千年蛻骨龍。物外自應多至樂。人間何事忽相逢。飲罷飄然不辭決。孤雲飛去杳無蹤。

戲書示黎教授

古郡誰云毫陋邦。我來仍值歲豐穰。烏銜棗實園林熟。一本作密蜂採檜花村落香。世治人方安壠畝。興闡吾欲反耕桑。若無潁水肥魚蟹。終老仙鄉作醉鄉。

書懷一作思穎寄常處士

齒牙零落鬢毛疎。潁水多年已結廬。解組便爲閑處士。新花莫笑病尙書。青衫仕至千鍾祿。白首歸乘一鹿車。一作幸。有西鄰隱君子。輕篋短一作披笠伴春鋤。常夷甫也。

渦河龍潭

碧潭風定影涵虛。神物中藏岸不枯。一夜四郊春雨足。却來閑臥養明珠。

遊太清宮出城馬上口占

擁旆西城一據鞍。耕夫初識勸農官。鷓鴣日出林光動。野闊風搖麥浪寒。漸暖綠楊纔弄色。得晴丹杏不勝繁。牛羊雞犬田家樂。終日思歸盍掛冠。

太清宮燒香

清晨琳闕聳巒岷。弭節齋坊暫整冠。玉案拜時香裊裊。畫廊行處佩珊珊。壇場夜雨蒼苔古。樓殿春風碧瓦寒。我是蓬萊宮學士。朝眞便合列仙官。

謝提刑張郎中寄筇竹杖

玉光瑩潤錦爛斑。霜雪經多節愈堅。珍重故人相贈意。扶持衰病過殘年。

七言二首答黎教授

撥甕浮醅新釀熟。得霜寒菊始開齊。養丹道士顏如玉。愛酒山公醉似泥。不惜藥從蜂採去。尙餘香有蝶來棲。莫嫌學舍官閑冷。猶得芳樽此共攜。

共坐欄邊日欲斜。更將金蕊泛流霞。欲知却老延齡藥。百草枯時始見花。

又寄許道人

綠髮方一作青。腫瘦骨輕。飄然乘鶴去吹笙。郡齋獨坐風生竹。疑是孫登長嘯聲。

扶溝知縣周職方錄示白鶴宮蘇才翁子美贈黃道士詩并盛作三絕見案拙句輒爲四韻奉酬。能基好飲一道士。醉墨狂吟二謫仙。道士不聞乘白鶴。謫仙今已掙黃泉。古來豪傑皆如此。誰拂塵埃爲惘然。華髮郎官才調美。更將新句續遺篇。

曉發齊州道中二首後一首

東州幾日倦征軒。千騎驂驪百草原。鴈入寒雲驚曉角。雞鳴蒼一作海浴朝暾。國恩未報身先老。客思無

柰一作。歲已昏。誰得平時爲郡樂。自憐瘠渴馬文園。

歲晚勞征役。一作晚歲。三齊舊富閑。人行桑下路。日上一作海邊山。軒冕非吾志。風霜犯客顏。惟應思穎

夢。先過穆陵關。

表海亭

望海亭亭古堞間，獨憑危檻俯人寰。苦寒冰合分一作雙流水，南洋北洋河也。一在州中，一在城外。欲雪雲垂四面山。州城四面皆山。
東四二面山差遠。
唯此亭高盡見之。腠肉已消嗟病骨，凍醪猶可慰愁顏。穎田二頃春蕪沒，安得柴車自駕還。

歲晚書事

一麾新命古三齊，白首滄洲願已違。軒冕從來爲外物，山川信美獨思歸。長天極目無飛鳥，積雪生光射落暉。臘候已窮春欲動，勸耕猶得覽郊圻。

謁廟馬上有感

旌旆曉悠悠，行驚歲已遒。霜雲依日薄，野水帶冰流。富庶齊三服，山川禹九州。自憐思穎意，無異旅人愁。

毬場看山

爲愛南山紫翠峯，偶來仍值雪初融。自嫌前引朱衣吏，不稱閑行白髮翁。向老光陰雙轉轂，此身天地一飄蓬。何時粗報君恩了，去逐冥冥物外鴻。

殘臘一作雪

臘雪初銷一作融，上古臺桑郊向日綵旗開。山橫南陌城中見，春逐東風海上來。老去每驚新歲換，病多能使壯心摧。自嗟空有東陽瘦，覽物慚無八詠才。

歲暮書事

東州負海圻，風物老依依。歲熟鷓鴣樂，天寒鴈過稀。跨鞍驚髀骨，數帶減腰圍。卻羨常夫子，終年獨掩扉。

聞沂州盧侍郎致仕有感

少年相與探花開，老病惟愁節物催。蹉跎歸計荒三徑，牢落生涯泥一杯。穎上先生招不起，沂州太守亦歸來。自媿國恩終莫報，尙貪榮祿此徘徊。

春晴書事

莫笑青州太守頑，三齊人物舊安閑。晴明風日家家柳，高下樓臺處處山。嘉客但當傾美酒，青春終不換顏顏。惟慚未報君恩了，昨日盧公衣錦還。

遊石子澗

富相公創亭

巖辭高亭古澗隈，偶攜嘉客共徘徊。席間風起聞天籟，雨後山光入酒杯。一作朝廷元老今華日殿壁遺文已綠苔泉落斷崖春壑響，花藏深嶂過春開。一作新雨亂泉逢石響過春深谷尙花開霽廳一作禽鳥莫驚顧，太守不將車騎來。

讀易

莫嫌白髮擁朱輪，恩許東州養病臣。飲酒橫琴銷永日，焚香讀易過殘春。昔賢軒冕如遺屣，世路風波偶脫身。寄語西家隱君子，奈何名姓已驚人。

水磨亭子

多病山齋獸鬱蒸。經時久不到東城。新荷出水雙飛鷺。喬木成陰百囀鶯。載酒未妨佳客醉。憑高仍見老農耕。史君自有林泉趣。不用絲篁亂水聲。

寄題相州榮歸堂

一本此篇已下係酬答安陽韓侍中五詠

白首三朝社稷臣。壺漿夾道擁如雲。金貂爭看真丞相。竹馬猶迎舊使君。豈止軒裳誇故里。已將鍾鼎勸元勳。不須授簡樽前客。好學平津自有文。

畫錦堂

昔憩甘棠長舊園。重來城郭歎人非。隨車仍是爲霖雨。被袞何如衣錦歸。公前出自四幅以武康之節鎮相慶今麗鈞軸以司徒侍中再

觀魚軒

當年下澤驅羸馬。今見犀兵擁碧油。位望愈隆心愈靜。每來臨水翫游鯈。

狎鷗亭

險夷一節如金石。勳德俱高映古今。豈止忘機鷗鳥信。陶鈞萬物本無心。

休逸臺

清談終日對清樽。不似崇高富貴身。已有山川資勝賞。更將風月醉嘉賓。

青州書事

年豐千里無夜警。吏公一作退一室焚清香。青春固非老者事。白日自爲閑人長。祿厚豈惟慚飽食。俸餘仍

足一作得買輕裝。君思天地不違物。歸去行歌潁水旁。

留題南樓二絕一本前一首題作偶書

偷得青州一歲閑。四時一作案頭終日面孱顏。須知我是愛山者。無一詩中不說山。

醉翁到處不曾醒。問向青州作麼生。公退留賓誇酒美。睡餘欹枕看山橫。

答和王宣徽一作答王宣徽見贈

相逢莫怪我瞠然。出處參差四紀間。有道方令萬物遂。無能擬乞一身閑。花前獨酌罇前月。淮上扁舟枕

上山。此樂想公應未暇。且持金盞醉紅顏。

答和呂侍讀

昔日題輿媿屈賢。今來還見擁朱轡。笑談二紀思如昨。名望三朝老更尊。野徑冷香黃菊秀。平湖斜照白

鷗翻。此中自有忘言趣。病客猶堪奉一罇。

奉答子履學士見寄之作

憶昨初爲亳守行。暫休車騎汝陰城。喜君再共罇俎樂。憐我久懷丘壑情。累牘已嘗陳素志。新春應許遂

歸耕老年雖不堪東作猶得酣歌詠太平。

謝景平挽詞

憶見奇童髫兩髦。遽驚名譽衆推高。東山子弟家風在。西漢文章筆力豪。方看凌雲馳駿驥。已嗟埋玉向蓬蒿。追思陽夏曾遊處。撫事傷心涕滿袍。

答資政仰諫議見寄二首

豪橫當年氣吐虹。蕭條晚節鬢如蓬。欲知潁水新居士。卽是潞山舊醉翁。所樂藩籬追尺_{一作斥}鷄。敢言寥廓逐冥鴻。期公歸輔巖廊上。顧我無忘畎畝中。

欲知歸計久遷延。三十篇詩二十年。受寵不思身報効。乞骸惟冀上哀憐。相如舊苦中瘡渴。陶令猶能一醉眠。材薄力殫難勉強。豈同高士愛林泉。

熙寧五年秋七月男發等編定

紹熙二年三月郡人孫謙益校正

寄題沙溪寶積院寶積去沙溪十五里詩刻猶在而諸本皆作寶錫今兩存之。

永厚陵挽歌辭前有引狀朝佐考公家定本如謝賜飛白詩引狀皆載別卷今編入外集第五卷此不重出。恕本惟亭亭作高亭餘並同正文。

【穎州唱和】東穎一作西穎何爲樂一作多暇

【靈駕發引挽歌辭】黠羌一作戎羌

【郡齋書事】秋熟一作秋色

【書懷】春鋤一作春鋤

【表海亭】亭亭一作高亭